

簡松草堂詩集

簡松草堂詩集卷十八

錢唐張雲璈仲雅

江上見覆舟惻然賦此

江行終日居坎窞天遣書生來習膽江心突見有
覆舟使我魂驚顏色慘帆摧柁折長檣撓浪翻雨
打兼風飄不知旋轉幾晝夜船腹尙在中流拋此
中無人有人骨大半已飽千年蛟先時反覆防罅
漏鐵葉聯綴今猶牢我怪舟行何不愼人言舟行
莫太迅不愁上水愁下水不怕風逆怕風順逆風
下水尙可留上水順風未全趁若教風水得兩兼

快意中間安可問豈無千里一日還願恐難酬事
亦僅我揆其說方喟然中有至理存乎天豈不見
駿馬下坂猛于虎銜檠時時折其股更不見鷺鳥
疾飛高入雲毛血忽被罟風分老板聞言心乍憚
遽把高帆顛一葉

江船長年三老之屬皆呼老板
卸帆謂之顛

翌日復見鹽艘沈於中流有感於近日淹

消事

鹽艘載官鹽大於數間屋以之行江廣其中有引
日一船若干引處處有稽錄長江浩浩行速至售
亦速輕將萬萬緡出入洪濤濁重舟抵急浪又或

山石觸一旦壞所載如雪以湯沃巨費付烏有春
聲不敢哭其名爲淹消隨地赴官告官爲勘驗之
遇事動斥駁謂其有私售遂令數不足托之於水
厄無由問盈縮此弊亦誠有不肖在奴僕不爲懲
其弊乃更加以毒文書上下別豈惜再三黷無端
逮其人有意鍊成獄稽留不遽訊遲久又須鞫船
中幾性命不暇更詳較凡茲官與吏必待滿所欲
所欲苦難滿滿則易申覆欲了一紙書不了盈寸
牘彼商亦何辜前後重羅酷風波本在天安保事
無續彼物彼自盜其說詎可服

小泊大通卽行順風揚帆江勢陡闊

放櫂孤村外蒼茫一氣乘驚濤翻石峽秋色澹銅
陵楚樹濛濛遠吳雲靄靄升不知仙骨少直欲向
空騰

不盡滔滔意長風未可收眼前惟一水身外任千
秋壘障迷歸路離帆溯急流書生愁膽薄翻欲暫
淹留

夜泊雪花套聞戍樓角聲有感

縱橫大艦壓江隄畫角聲繁夜轉淒水上魚龍驚
欲舞天邊星漢迴將低健兒苦奏胡笳拍班馬驕

聽戰鼓鞞莫道時平閒列戍萬人矯首望安西

江上遇揚州便舟不及附書悵然有作

瞥眼看歸櫂相逢只暫時隔風飛語亂逆浪卸帆
遲水上鱗偏遠雲閒雁不知忽忽書未達心與爾
俱馳

皖城二首

沿流一帶好煙鬟又見嚴城積翠閒我欲過江風
浪惡推篷看殺皖公山

東來默數半行程

揚州往武昌至此方半途

晴色橫江過皖城

三十六鱗秋更遠生憎潮水太無情

相傳江潮不過安慶

繫纜

繫纜驚魂歛船開面面牕涼煙沈大壑落日蕩空
江秋氣乘愁至鄉心對酒降蕭閒輪白鷺來往自
成雙

小姑山

小姑山石江心矗天外亭亭削寒玉我從山下溯
波濤一柱中流相抵觸聞名旣久見應喜幾度回
頭看不足有如美人戍削裝窄襟小袖褰羅裳長
身不屑具媚骨舞態似欲凌風翔又如壯士戎服
整珠勒錦絳紅袂影生來年少好身手猛氣雄心

常挺挺大姑未見見小姑兩山相對遙相呼小姑
若比閨中秀不是環肥是燕瘦

湖口

嚴城一角傍山隈彭蠡風煙自此開暮雨遠連湓
浦暗驚濤寒捲小孤來匡君何處逢真面陶令猶
思酌宿醕便欲去爲黃鶴客滿天秋色不勝哀

晚過九江隔岸卽黃梅縣始入楚境

我亦潯陽客無人舉酒杯涼風催白雁暮雨暗黃
梅大舸中流去長江九派來行行蘭芷地先說楚

王臺

琵琶亭

琵琶亭下小句留不見潯陽送客舟鐵騎銀瓶無
嗣響荻花楓葉自深秋回燈尙憶當時宴掩泣難
消滿座愁翻怪使君能好事屏風未畫白江州亭
於唐寄蝸榷使後來者皆踵而修之全楊莊榷使
更廣其地添置閣檻雜蒔花竹爲一時勝遊之所
惟此處宜專祀白公乃前檻供闕壯繆而於白公
反無遺像不無缺焉傳聞好事者畫我作屏風卽
白公江州詩也故末句及之

予未楚行裴兒先歸杭州鄉試今秋闈屆
期月中馳念書三十韻寄之

歸未市月安行作經年別況汝又先去此意尤酸

瑟我行汝未送汝歸我早出蹤跡似相避不暇生
嗚咽疑有未盡言志向汝細說尋思了無語祇是
別愁結此別殊率爾鑄錯欲聚鐵汝歸與賓興中
已十年熱雖非丹九轉却比肱三折此時席帽人
八千共扁鐫風簷樺燭紅是汝心上血奇才任恣
肆奧句事剔抉幽惟鬼神通利可犀蛟截博須訂
文鼠悞莫讀雌蜺舌底蓮可生矛頭米能漸其難
固戛戛有餘詎子子非惟蝨貫心直向虎探穴知
汝力能勞知汝志早決會亦等適逢願豈竟虛設
佇待小春初飛語或占吉反祝消息遲未遽判得

失我今事浪遊惟此望最切楚中非無緣汝祖舊
持節戊午迄辛酉所至多宦轍莊已陸氏荒貧誰
任公恤干支今正同思之涕欲雪今年辛酉去先
大夫視學楚中
屈指周
甲矣我將爲貧仕此念久中撤願汝有鳳毛莫
更嘲坦率大江秋氣甚風雨夜涼澈念汝白袍單
倚櫂轉淒絕

潯陽寄家書

離情和雨暗行舟寄得家書轉自愁今夜黃蘗江
上夢直從湓口下揚州

道士馥

在大治

眾山如伏鼇一鼇忽昂首臨江兀然立鞭之不肯
走其下不知幾千丈定有神龍成宅藪名爲道士
渡奇險不可狃纍纍怪石趨赴江萬馬奔騰飲溪
口忽然一面獨削平巨刃摩天是誰剖江流阻石
江愈怒石勢插江石更陡盤渦千箇萬箇來如白
如箕復如斗深者直疑數丈井大者還同五石甃
滿江濁水如酒黃此獨陰沈黑而黝船來旋轉不
得去雙櫓夾篙行且守萬一脫手成不測事不盡
然理則有我今徑過無懼色暫壯心神總非久決
水難逞東海臣移山終仗愚公叟世閒至險倘可

平天亦無權天意否古來二華本中分不信靈胡
有此手

大江對月歌

大江萬里無一物長天萬里惟一月月輪近水不
近天倒轉江心爲月蟾仰天疑月卽在頂引手提
月嫌手冷眼光如電入月中看微不見姮娥宮蟾
蜍玉兔浩無影似有桂樹青濛濛是時風輕靜澎
湃呀蛟呬龍敢爲害月從水底照纖微絕勝然犀
燭光怪乘槎擬向天邊遊猶恐清虛之府不我留
便將往從謫仙去又恐騎鯨不知處我欲下起水

中之江斐上招月裏之寒簀遠邀帝子自洞庭近
挾二女來瀟湘更有仙人朱無忌作賦相如還未
至爲我張仙樂命水嬉白虎鼓瑟兮龍吹簫長揖
水伯兮牽冰夷江波盡變作春酒醉倒不知杯在
手人生快意更何有吁嗟乎人生快意更何有只
恐清光依舊動離愁寒倚篷牕看牛斗我將從此
成飛仙一念又墮三千年

艾家洲小泊

暝色四山起一山猶夕陽漲沙橫港路水氣上漁
莊宿雨吳天潤雄風楚國涼不堪秋思逼雁影入

魚蠻子歌

楚江漁者連船數十無論晝夜截流而
漁所在有之蓋卽東坡詩中所詠魚蠻
子也東坡謂其以魚鰕爲糧不耕有餘
以爲至樂惟慮算及舟車所以深幸之
也近日此輩千百爲羣多不可問大吏
因嚴夜漁之禁亦未見其盡遵故有感
而作歌雖仍東坡舊稱而命意則與坡
異

魚蠻子生長風波不畏死平生似與魚爲仇不盡
江魚不肯止羅筌樛木排中流如山白浪天邊浮
扁舟爭與浪高下一網截斷瀟湘秋此曹豈必無
性命事有所託拌生求以身居險心更險取人每
作荏苒謀雖然以是爲世業中藏叵測難窮搜大
府知之嚴令甲不許深宵相混雜果能出入盡有
稽縱有探丸敢陰挾恐有滯人無治法嗚呼恐有
治人無治法水鄉到處盡堪虞君不見吾鄉竊盜
多若雪

中秋夜江上大風陰晦時泊黃石港

明月應憐我今宵只獨看故將雲葉斂恰稱酒杯
殘破浪三秋壯依人萬事難家園歡宴處桂魄定
關樂

蘄黃道中卽景

鳥影衡流去龍腥入座聞鄉音千里斷秋色一船
分是日帆腹陰韜日濤頭冷濺雲鄂城知漸近旅
思正紛紛

過黃州懷蘇長公四首

詩案紛紛說李何謫來曾記五年過王生雞黍潘
生酒名姓居然伴老坡

一箇朝雲侍逐臣
寓居飽看海棠春
分明輸與龍邱子
駿馬戎裝兩美人

當年貧困竟如斯
廢壘躬耕力不支
纔種黃桑三百尺
何人更乞去雪堂貲

元豐壬戌汎輕艫
兩度豪遊興未降
我在清風明月裏
東來不見鶴橫江

土腦嘴阻風一晝夜
復阻風打石磯又阻
積磯港遣悶

昨行廿里餘風猛
不可飭今纔數十里
風水兩奔觸連朝
不快意甚於遭縛束
況逢磯石多前途盡

泗水維舟荒江岸相對幾茅屋我行已兼旬留滯
苦不速有如騎鈍馬步步用鞭扑有如數竹節寸
寸欲留目安得駿馬疾走坡安得快刀徑破竹

將抵鄂城感懷二首

輕帆吹入楚江流往事能教感百憂一代文章存
異數三年杞梓得全收輶車尙憶皇華路講座虛
瞻絳帳秋舊是先公持節地我來只上仲宣樓
先司馬於乾隆丁巳御試一等擢侍講戊午卽
膺湖北主試之命明年接任學政嗣後連掌文柄
皆由於此

非關惜別怨殊方六十年來事豈忘詞賦有靈憐

屈宋芷蘭無路托沅湘全交肯廣劉郎論作計難
憑陸氏莊我昔未生今漸老祇應流涕話滄桑

署齋澄心亭晚坐

屈曲紅闌畔幽亭對晚霞涼深三尺水秋老一叢
花獨客依臯廡羣賢似謝家昨宵江上夢猶是落
蒹葭

黃鶴樓

秋色西來萬里蒼憑高極目楚天長羣山直到荆
門綠斜日平添漢水黃鸚鵡隔江憐處士蘭茝無
地怨孱王我曾跨徧揚州鶴一例神仙事渺茫

題嘉禾褚二翁雪

爾錫

春江返櫂圖

禦兒人去動經年
江雨江風隔楚天
離色冷滋湘竹淚
詩情遙墮月波煙
漢南又綠桓公柳
幕府偏紅庾杲蓮
只說欲歸歸未得
也應慙負燕梢船

禾中船名

燕梢

披圖歸計敢嫌虛
萬里橋頭說故居
雙袖尚留吳郡本
卅年空食武昌魚
天涯芳草袍應妬
門外春流笏不如
古寺漸看東塔近
鐘聲正及卸帆初

寺與君居陸相隣

東塔

訓褚九集齋

全德

見贈原韻二首

青油幕下足清娛玉佩何曾利走趨投我文章丁
敬禮羨君書記阮元瑜吟當官閣梅應早感到江
潭柳已蕪荆楚由來名士地未容彈鋏說歸途
飢驅如此路應難鄉信迢迢怨楚蘭鸚鵡能言空
復爾芙蓉爲鏡更誰看無才枉自慙知己長揖猶
容向達官客裏知君兄弟樂自憐哀雁一行單
聞人談逆匪殺人之慘爲之髮指因紀其

實三首

烤火

縛人置烈火上炙死之謂之烤火

積薪厝火烈燄高中央置人同魚羔穿脇入腹腸

肺熬百脈全涌如奔濤裂膚不見血但見流脂膏
人人願求刀下死白鐵斷頭涼似水

澡浴

以沸湯投人其中謂之澡浴

鼎水百沸煎人魂命畢湯火如雞豚殘皮腐肉棄
滿地百萬但飽鳶鳥吞鳶兮鳥兮汝莫食此是良
民未從賊汝不見鄖襄多少迫脅人挽盡西江澡
不得

戴頂

削竹尺餘椽人頂門留寸許於外謂之戴頂蓋嘲兵勇之得功賞也

很賊殺人不用鐵一尺長簪椽腦裂雙睛墮眶舌
出口七竅殷紅盡含血椽不盡入留寸餘敢以名

器相擲掄 朝廷賞功常孔亟冠頂時加不次職
嗟爾兵勇速殺賊念此冤民苦毒身莫使頭銜有
媿色

題周封翁紉蘭聽松圖長卷

先生之心如松古先生之貌與松伍先生之身健
於松松見先生亦喜舞生平不肯污兩耳終日空
山松下處對松不足還聽松松之有聲卽松語松
本有語人未知松不能語風代之惟有先生解其
意口未能傳畫可記君不聞細風泠泠含此是松
清談有如捉塵人一室共討探聽之娓娓忘憂悵

世間枉自笙歌酣又不聞長風來松之音吐何爽
哉有如慷慨士衝口率臆無嫌猜咳唾珠玉祛塵
埃聽之一一心胸開或時陰風細雨滴滴在松梢
聲淅瀝有如苦吟人幽徑時將佳句覓聽之可以
破岑寂或時疾雷風怒號天半仿佛來洪濤有如
猛士轉戰鏖暗鳴叱咤氣不撓聽之拔劍雄心高
靜中於心時有合一路清陰蒼蘚踏更將逸興發
高吟直與松聲爲問答大椿在養蘭陔居歲寒松
友常相娛先生自謂松處士

泰山有人處士松

說先生松

大夫

次韻恒梅村觀察

慶

雪夜遣懷二首

本是飛鴻爪來爲踏雪過綠尊
虛泥飲黃竹有哀歌風裂將軍
帳冰敲壯士戈何時聞入蔡李愬
最功多

時聞二竹捷音

且作袁生臥誰爲范叔嗟謝庭
風外絮羌舞劍邊花夜色燈無
暈春心草有芽更闌寒愈劇應
識萬行斜

聞雁有感

天邊孤雁自衝寒淒斷哀音入
耳難一个士衡留不得萬行清
淚落更闌

梅村觀察屬題畫卷四幀

宜園雅集

滇南節署園亭也觀察尊甫
恭愨公時賢雲貴

公子趨庭使署過當年主客共鳴珂
清香畫戟消紅日瘴雨蠻煙易綠波
高譙酒依金谷數勝遊人比竹林多

圖中共
八人

卽今官貴施行馬猶憶西園舊

薜蘿

晏坐聽秋

秋聲本來遠忽然聽之近秋聲本來近忽又遠
相引西風弄狡獪往往不易準到耳尙如此焉得傳
畫本惟有晏坐人默數殘檠隕悠然有會心微笑

不露矧秋無兩般聲人有一心忖愛秋韻多妙悲
秋意多憤所以六一翁作賦自愁損公雖寫其遇
意不相合脂垂頭羨小童涼夢竹牕穩

江橋策馬

漢中永昌蘭滄江兩岸峭壁陡削中間江流湍急相傳諸

葛武侯用鐵絙聯絡上鋪版以通車馬名霽虹橋履之者如步虛而上神魂欲飛棧道不足數也觀察謂生平履險之地無逾于此展是圖者猶覺心悸況親歷者乎

華山不可開靈胡手擘分中央大海不可跨祖龍
鞭石驅爲梁天之設險豈有意天欲濟險亦豈易
公然竟以人力施傳自武侯留蹟異蘭滄江岸石

壁陡一綫洪濤穿壁走懸崖上削勢不留急湍下

瀉力不收萬古無舟楫隔斷行人愁天公此際亦

無萬全策除是涸盡長江流何年鐵購西天烽

占城

貢西天烽
鐵見宋史

首山之鑪鞴有熊驅使辛銳命祝融百

鍊繞指赤汁鎔巨綆幻作晴天虹兩山聯絡絕壁

通遙看三百八十尺天矯舞出雙飛龍行人見此

愁膽裂欲度不度勢疑折或如踏波浪身在中流

時宕漾或如上天梯蕩蕩四面無攀躋或如舞組

攸索上相逢更相倚或如步空虛冉冉來叩雲中

居羊腸鳥道合併作一路不敢回頭左右顧萬一

失足詎可知直恐隨風天外去披圖尙覺心魂驚
不知身到如何行猱升鳥飛見亦怯只讓仙骨珊
珊輕梅村觀察時年少萬人瑟縮公偏笑叱馭王
尊本壯懷題橋司馬還長嘯當日宗臣煩臥鎮六
詔風煙埽餘燼公子翩翩意氣豪舊遊指點猶堪
認吁嗟乎蜀道之險何有哉百蠻果自天邊開看
公天馬行空來嗚呼看公天馬行空來

秋館養病

時在軍中

帕首鞬刀氣不磨暫從閒館養微病酒邊看劍雄
心起喜報荆南殺賊多

弭節秋風瘦不支
茶煙影裏鬢如絲
佇教唱凱聞笳鼓
恰稱將軍病韻詩

旅病柬署中諸同人二首

拳足支頤一味慵
羊裘自顧太蒙茸
月銜牕紙光三尺
燈亂瓶花影萬重
羈束雄心輸駿馬
鈴鐺瘦骨等飛龍
靜中消息憑誰問
葉落閒階是客蹤

塗金屈戌玉枰叉
風物蕭閒且當家
歸思濃於初漉酒
詩情澀似未開花
鑪深乍覺宵寒減
茶灑難將睡網賒

釋皎然飲天目茶句聊將睡網賒

猶有多才冰署客
此

來真箇類搏沙

和署中同人冬齋雜詠四首之二

瓶花影

膽樣瓶邊整復斜
燈前寫出折枝花
千重慣上銀簾押
一半平分玉畫叉
移入枕函應化蝶
傷來弓影亦疑蛇
無端漏盡春消息
只隔文牕六扇紗

雲母牕

新糊繭紙薄難勝
安向紅蠻格一層
料峭尙嫌風影亂
空明不礙月波澄
曉奩色映琉璃匣
夜閣光涵翡翠燈
乞取并州雙翦快
倩他纖手琢春冰

門人子年

桂昌

齋中懸水墨畫牡丹一幅

因成一律并以爲塾課

三尺花枝墨一丸定知春事不寒酸敢將絕豔汚
金粉但借餘薰到綺紈羣玉返魂傳綵筆沈香流
影上雕闌人閒姚魏燕支悞只讓裴家冷露盤

翌日署中自南觀察

梅村雙峰

暨諸同人皆有

和什清辭麗句應接不暇殊有稊稊在前
之媿復成一章

調鉛殺粉太尋常染出隄麋濬亦香翻對名花憐
舊色似曾墨勑受東皇春痕黯澹琉璃視雲葉模
糊玳瑁裝底用紫絲圍步障畫屏須得阜羅張

壬戌人日梅村觀察招集二遊書屋用高
常侍人日題詩寄草堂句分韻得題字

梅邊新酒喜同攜巷尾傷簫聽未齊
讌似南皮賓滿座風纔東面雪融泥
已知翦勝傳今俗還擬登高認舊題
昌黎有人日勝有道衡歸思在花前覓
句轉淒迷

正月十五夜梅村觀察張燈宴客分詠上
元故事予獨得三首

漁陽三撾

古鼓以三通爲節非以撾撾爲三撾也

老瞞高會觴元夕鼓史呼來裝束窄
岑牟單綬挾

雙槌原是同時座上客是時賓從言無譁滿堂火
樹交銀花平原處士意兀傲三通競作漁陽撾一
撾初罷音何厲八十萬軍皆奪氣營門刁斗寂無
聲月魄不動疑倒行二撾聽徹常冬冬手不在鼓
如在空後來意自蔑黃祖此際目早無曹公左槌
右槌相繼舉大槌小槌難悉數一槌兩槌怒似雷
千槌萬槌急如雨當筵酒冷燭花碧忽聽空階生
霹靂三撾之撾音更激果然此聲出金石君不見
禰生骨埋鸚鵡洲墓門淪入江波流江流至今有
餘怒猶似洲洲一片鼓

李謩酒樓壓笛

上陽別殿笙歌雜樹色朦朧花蔭合誰家年少傷
宮牆記譜能將纖爪招長安市上多酒樓新翻曲
在樓上頭宮禁深沈聽應寡那得外人等閒寫華
燈影裏萬遊人忽聽傳呼捕笛者笛者姓氏知李
謩果然此曲人間無可憐當日霓裳舞不敵漁陽
動地鼓淒涼劒閣雨淋鈴更有何人屬耳聽謩兮
謩兮休自喜斷腸尙有龜年李

狄宣撫張宴奪崑崙關

萬樹銀花來夜照營門開營門高會酣歌舞不許

譙樓傳畫鼓，燈光照劒鐵。氣熱銅具將，軍面如虎。
將軍者誰狄，宣撫廣源蠻。奴僂智高關，門反距崑崙。
崙牢將軍潛，師忽夜出萬馬疾。行不敢驕，華筵酒
令如山重。三軍將令氣尤涌，甲冑光中搏戰豪。笙
歌叢裏兵機動，一輪皓月天中行。姮娥下視雄心
生，不照歡場照殺氣。殺氣消時捷音至，捷音傳到
酒未寒。坐中壯士髮植竿，恨不同斬樓蘭還君不
見北軍飛渡千尋鐵。元濟就擒三人雪，不及將軍
讌佳節。將軍歸來應更酌，酒灌漏卮肉填壑。不須
競病賦新詩，花腔打出從軍樂。

喜晤蘭陵陸邵聞

耀通

卽題其雙白燕堂

詩草

江頭邂逅正青春，好句傳來見性真。
蘭芷自芳三楚地，風花宜對六朝人。
仲宣樓遠波如雪，杜牧簫寒月似銀。
一樣通眉長爪客，天涯輸與苦吟身。

送梅村觀察督運北上

江流東下波湯湯，舳艫轉漕沿流長。
庾氏之掌有正供，歲歲飛輓輸神倉。
艤艦廣如萬閒廈，懸蒲百尺風飛揚。
督糧使者建大纛，奕世貴胄尊天潢。
百八十艘銜尾進，一一魚貫兼羊腸。
政明令嚴聽

者悚約束丁衛無恆勦公會五載佐軍事振振均
服貔貅行進之以金退以鼓猛奮盡作縵胡裝颯
然而動似風雨截然而止如堵牆知公督運同督
戰魚麗驚鸛皆開張迴帆之撾山谷應殷地之角
星河涼壓波畫鷁數十里聯絡首尾權中央況當
春時日載陽船牕氣煦春花香陽侯不動石尤靜
上下一碧生天光公於此時坐清畫輕裘底用披
鵝鷁江山清空足放眼手敲佳句聲鏗鏘公才有
如萬馬駟海水百沸煎搏桑吟賤公牘埽落葉左
右侍史紛趨蹌登高懷古心慨慷興酣下筆龍蛇

翔滿船僚佐盡嗟歎吟嘯還駭黃頭郎況復翩翩

有書記元瑜休璉工篇章

謂褚集齋

論文或然照渚炬

橫槊更奠臨流觴鯁生適館方半載弟子頭角皆
昂藏緇衣夏屋感公意讀書兩廡聲琅琅有時聯
吟擊銅鉢險韻如挽弱弓強相如居然居客右容
我俯仰生清狂我家揚州作寓客公去正泊隋隄
旁惜哉不得備賓從躡屐同上歐公堂新秋擬買
下水橈向公更把行期商待公遄歸讀行卷好與
軍中一集細細相評量

公有軍中詩鈔曾屬余弁言

倚樓圖爲門人

桂苴題

高樓天迴秋如水樓畔人閒坐秋底錦帳虛涼捲
暮潮隔江船笛參差起笛聲飛來樓上頭聽之未
免生離愁離愁如笛吹如縷樓影沈沈楚江渚楚
江之樓爲汝一一數庾亮樓在武昌晴川樓在漢
陽黃岡竹樓隣雪堂黃鶴舊是神仙鄉此樓不知
何所似但覺四壁夜氣生瀟湘橫空嘹唳聞飛雁
云有思鄉心一片思鄉有心畫不得但看憑闌已
可見樓前之景終繁華不比獨客依天涯長安欲
歸歸尙早莫學南冠人姓趙

顧伴繁明府

湖

寓居鵲園作探春絕句十

六首索和久未應命連日春色已妍因次
原韻雜抒胸臆不計工拙也

無端來作江潭客幽芷芳蘭又好春未免臨風易
悵悵天涯等是未歸人

年來何事不忽忽休對青春唱惱公無限武昌江
上柳人家多在綠絲中

出門便是看花場處處平蕪綠繞牆此際不宜標
格冷梅花退盡一年香

客中心事總如麻幾度行吟楚水涯昨日百花生
日到綠卮先壽碧桃花

霽園春日好樓臺樓外風帆一向開來往遊人盡

晨肇未容君獨擅天台

主人劉姓園中有閣名小天台

此中近有仙鳧住吏隱耽吟意正拳畢竟隱多還

吏少出山泉是在山泉

謂明府

螳折螺旋路總紆巉巖乍到俗氛除霽園別有干

重霽花霧吹來水不如

我曾四度坐匡牀愛對修筠佇曲廊猶記去年初

過此一庭寒翠正重陽

廿番風信急如雷花事分明次第來大抵繁華容

易過只應留戀不應催

東風香霧海棠梢畫裏坡公不厭招振觸舊遊王

戊在未須多事客吹簫

圖雙峰觀蔡東坡之爲人取海棠詩意畫春宵燒

燭圖予爲之記赤壁之遊在元豐壬戌今年又壬戌閱十二甲子計七百二十年矣

吳羹斟出費吳鹽鄉味生來未易厭見說江魚多

上市踏春齊向酒家帘

幾回鉛淚灑荆枝看到閒庭意每遲我已無人賦

春草西堂殘燭酒醒時

予方抱鶴原之痛園有春草亭故云

暖風遲日好披襟到處芳華許共尋只有鄉心尋

不得年年空抱越人吟

芳信迢迢怨楚蘭客中吟席幾曾安廣陵十里花

如錦又悞珠簾兩度看去年在都今年在楚廣陵春事已負二年矣

吟社何堪比月泉故人曾共寓承天玉階花影雕

闌燕風景依稀似去年去春在都與陳茗街明府同寓萬明寺茗街在楚會

居霽園

好春如酒且中之晴雨寒暄總繫思誰著朝衣閒

拄笏衍波牋寫玉臺詩

查篆仙觀察淳自楚南督運過鄂謁於舟

次因呈二十八韻

我昔在揚州未與公相見公嘗觀察常州險語題九

烈觀者皆色變會為題查氏一門九烈詩公謂我能此復示梅

壑硯

又屬子題梅壑老人硯冊

至今梵夾中猶識塗鴉徧雖近

冬日心尙隔春風面公逢薄言想遽令一階殿從

此跡更疏南北異鄉縣昨歲客春明始識巖下電

引我葭莩親共我笑言晏時當青春深梅舫樂文

讌

梅舫公京邸齋名

王生適在坐狂論驚河漢

謂仲瞿孝廉

公

後膺簡命弭節蘭芷岸我亦來鄂渚黃鶴共羈

絆公宜不我知我固向公戀迢迢千里閒誰問雙

魚便忽聞使旌來令我旅懷忡庾氏有正供飛輓

力爭先百七十餘艘一一數可按畫鷁應共飛常

蛇詎容斷泊或雁翅排進必魚尾貫船頭鼓角齊

船尾笙歌亂況當春日麗篷牕掠輕燕峭帆細雨中時雜萬花片江山景清雄放溜直於箭披襟帶吟興好句珠一串公時抱微恙於此定得閒顧我苦局促焉得生羽翰恨不從公遊茲遊良汗漫

寄和梅村觀察途次聞署中同人花時觴
讌有感原韻二首

閒庭日日惜紅芳幾度招邀泥冷觴水上濃陰憐翠幄天涯畫舸憶沙棠芷蘭添我三春怨鴛燕隨人一例忙披拂春風總離色不禁花下又迴腸春共征帆雨不停鏡中誰復鬢同青少年一去花

如霧壯氣長看劍似萍簾額護塵香宛轉屏風留
客語忪惺只餘江上相思夢流過寒潮未肯醒

又和觀察上巳舟中原韻

佩到芳蘭正楚天沈沈蟾影瘦于弦煙花別後逢
三月流水看來又一年漲綠冷侵遊子袂飛紅遙
送使君船不知多少湔裙女輸與鴛鴦自在眠

和劉七賓叔

方曙

晚春夜雨原韻

落花芳草兩如何九十韶華一雨過翡翠簾深香
似霧芙蓉江遠酒生波鑑中影寫鵲紅冷衣上痕
消慘綠多我是西泠未歸客年年流恨滿春蘿

妾薄命一篇題憐香便面

慧姑李孝廉曉岑保母之女幼相狎也
及長慧姑心許孝廉而澀于言孝廉旣
娶慧姑知不可合抑鬱以死孝廉知之
憐其意圖其容於扇題曰憐香便面徵
好事者詠焉予見吳南池贊府妾薄命
詩因仿而爲之卽以名其篇圖固未見
孝廉亦不知何許人慧姑亦不知何姓
南池篇中皆略而未詳故亦從闕如

妾薄命妾命非薄妾有性初七與下九相親似同

姓除却羅敷復誰聘蕉葉空含未展心桃花長抱
傷春病妾命薄妾命非薄妾意錯鸞凰自有侶安
得儔燕雀以死從君亦非惡不嫁王昌願已酬終
憐絡秀家何托東隣女兒容顏光西隣女兒如我
長一朝遣嫁出閣去花花葉葉相對當當時弱質
不遽死豈必檀郎終遜此未通媒妁已如山不用
盟言還視水生時一語不肯說死後柔腸寸寸結
爾貞無可貞爾節不見節我怪其癡重其潔題以
憐香嫌太媒吁嗟乎畫圖省識今已遲何不從前
早覺之欲全其事非難處慧姑慧姑誰負汝

鄂城雨中送春

春來春去總天涯
人在天涯恨轉賒
蝶粉冷消千點雨
鶯簧愁戀一分花
不知相送終何處
未免多情又憶家
昨歲長安今楚國
鎮將離別管年華

寄揚州曾賓谷都轉四首

題襟高館讌涼秋
曾到龍門最上頭
擊鉢乍分金谷酒
橫江又送木蘭舟
芙蓉顏色成空渚
鸚鵡才華賸廢洲
作客久憐非故土
不堪王粲再登樓
才福如公有幾人
相逢情性豈嫌真
千秋政事文章蹟
一個神仙富貴身
說士定知常勝肉
種松何

處不成鱗平生知己無多在座上風來又隔春
吳頭楚尾汎輕槎望斷江波不見家閉置自同三
日婦曹騰空負二春花謂不與辛壬兩春開人間舞笑矇矓
鶴夢裏寒驚宛轉鴉膽有邱遲殘錦在幾回無色
媿餘霞

慘綠韶華願久空鄉愁春色兩忽忽飄零鴻雁長
留雪蹭蹬爰居欲避風豈是元關揚執戟更無好
句寇巴東自憐建業書生事不敢投牋向魏公

簡松草堂詩集卷十九

錢唐張雲璈仲雅

初夏過顧伴檠明府寓園坐延爽閣竟日
用杜少陵陪鄭廣文遊何將軍山林十首

韻簡明府

江國三千里離愁廿四橋登臨舒倦眼颯爽近清
霄自許捫蘿至無煩折柬招朝朝凝望處未覺翠
微遙

糧儲署後望見園中山

崇府岡頭路名園入夏清迎人仙戶犬對語綺牕
鶯敷徑花成坐連山筍可羹自來堪畫處疑在輞

川行

步怯莓苔滑停依石筍支夕陽橫抹樹細澗暗歸
池花墮蜂猶趁簾深燕不知忘形無主客相對一
襟披

我昨尋春至樓臺處處花過牆猶粉蝶赴壑已修
蛇壓徑藤陰合緣坡竹色賒清談宜共醒莫問酒
人家園外道左有來鶴酒家

放眼危欄迴江天萬里開白雲川外樹黃鶴笛邊
梅獨抱幽懷至誰飛逸興來幾回金屐齒蹴損舊
蒼苔

瀹茗江波活清恬勝澗泉竹牀涼似石藤枕輒于
絲蔓引臨風帶荷生貼水錢卽今行樂地不必問
前川

此日西泠路停橈湖水香四圍丹嶂合萬柄綠荷
涼獨客憐鳥繞前期笑鹿藏不堪留滯意搔首問
青蒼

我於官閣畔日對一方池帶雨拖筇竹逢花礙接
離柳低新燕子萍擁小魚兒清景終輸此朝朝擬
共隨

高閣無人到幽牕鎖綠雲聯牀同跂脚把酒細論

文樹影連城暗江風入座分羨君兼吏隱詩思日紛紛

卽此耽幽興終如作客何宦情君已達別緒我常多豈有籠紗句徒聞斫地歌異鄉知己在不憚數經過

李嗇生同年用去秋送別韻見懷四章再
次原韻却寄

贈別曾無釋左驂經年離緒我何堪浮身慣賦驪駒北客路重依鳩舌南門外雄心誰虎臥天邊兵氣認狼貪到來一片塗膏地欲問當官苦未諧

獨客無歡興莫乘底須尊酒說蘭陵眼中事業無
餘子度外功名有代興時禮部試初畢青鏡流年成我老
絳紗習誦媿君能不平意氣難支骨傲盡江峰萬
笏嶒

人閒何路不崎嶇
峯湘竹湘蘭怨倍深
大府雷霆威
自遠空山豺虎跡
相尋羌村詎有生
還喜淮蔡終
當入夜擒會見
紛紛煩白簡
輓飛誰識局中心
感逝傷離氣不雄
夜臺一雁信難通
十年手足關
心盡兩地江山望
眼同客思久看黃
鵠月歸期猶
隔鯉魚風平生知
己如君少悔煞當
時別意忽

題宜興湯息帆晉錫讀書秋樹根圖冊四

首湯時爲勺亭山長

石與人俱瘦天將樹共秋閉門稀俗客把卷失閒
愁楮陋三年刻田無二頃謀殘編隨偃仰千載可
同遊

山茗思陽羨江魚飽武昌不同王粲賦都拜馬融
堂觸硯雲陰暗銜階石氣涼勺亭精舍好老木正
蒼蒼

屏弱書生氣飛揚壯士思十年無用處一酌且論
之事業朝看劒功名夜引錐知君常簡練豈屑斷

吟髭

楚氛未靖故云

我跨揚州鶴西飛遡大江與君同作客之子更無
雙秋意深搖落雄風易擊縱願隨圖畫裏來共讀
書牕

應大叔雅將赴新昌司訓任郵書爲別予
以滯留楚中未能面送却寄

去年揮手別江上初涼天君訂會面期期以鵬鷖
遷自我入楚中十見上下弦欲歸歸未得予于蠻
江邊昨日雙魚來語意何纏綿不言長相思但道
離懷牽離懷向何處擬汎之江船之江東復東近

接蘭亭賢君官於此中講席銜三鱸廣文飯不足
賴有腹笥便文字亦可煮筆硯亦可田絕勝馬扶
風絲竹生徒前我去故鄉遠帶水路且千隔君兩
重江欲見無由緣同君客揚州幾及三十年我本
欲去此不謂君我先明知有此別言別早黯然明
知有此別未別且留連我少無宦情自以非才憐
亦將爲貧仕妄冀專城專誓早歸故土湖山志終
焉以君鬪鴨闌對我羅魚釜買溪無別主王建句買斷竹
別主卜築成小眠事未可預期持此念頗堅藉君
爲佐證笑語他時顛直恐相見老霜雪盈其巔豈

惟雪盈巔此時髮已宣未免悲遲暮淚落如珠聯
送君無所恨恨不待我旋夜夜江渚夢飛墮西湖
煙

斲簞用昌黎鄭羣贈簞韻

斲州竹簞夙所知今來始識良工奇籊籊一抱似
擁腫妙手熨輭涼玻璃勻裁輕擘組織細霜皮滑
淨終無疵世無龍皮澄水帛得此亦復需何爲火
雲當天不得食僵臥未許廚煙炊果然涼風生肘
掖紗幔竹枕尤相宜楚中多竹廉價直而此頗費
金錢貲悅然置我秋水上風過似欲生漣漪大夫

之簀華且睨無乃目動曾家兒北牕跛脚樂閒靜
鼻息幽細忘噓吹修篁千挺接蒼綠不知晝午停
紅曦瀟湘煙雨滿一榻秋氣入夢吾寧衰

輓梅村觀察

時督糧北上至臨清病暑道卒

江頭畫鷁送春風轉眼旌旗入望空千里羈魂馳
日下三秋鄉信斷蠻中鳳狂龍躁初禪杳雁冷爓
哀楚些同多少賓僚紛雨泣一時齊說寇巴東

金鞭銅斗唱饒歌死去雄心尙荷戈幾載宦遊稀

骨肉

公補官數載長在軍中去秋始經回任未半載又督運北上中道捐館

全家歸

路托風波使旌別後書留篋賓館秋來草沒韡我

似羊公舊時鶴不堪翹首淚痕多

鄂渚中秋

仍是他鄉月相依隔歲人不嫌蟾魄斂

去歲中秋陰晦今陰

晦亦如之祇惜玳筵貧空外波如練風前酒有鱗那堪

飄泊意猶復滯江濱

去年此日阻風黃石港今年留滯之苦不減石尤也

旅貧有感

秋來傲骨又重新滯跡天涯詎有因一飯何恩成
古誼百年無地著閒身已憐蟬腹空爲計畢竟豬
肝不累人輸與畫叉三十塊老坡猶覺未全貧

歸期未定疊前旅貧韻

江上征帆處處新
歸期數罷又無因
聽殘碧瓦連宵雨
倚徧黃花耐冷身
四百日中仍故我
二千里外復依人
而今不貸監河粟
拌得黔婁一味貧

秋宵風雨徙倚空齋時
東君眷屬盡行友
朋亦相率以去
惟予尙無歸日
四顧淒然
再疊前韻

天涯鄉思幾回新
雨細燈殘憶舊因
瘦菊慣成名
士態孤螢生就苦
吟身碧紗牕冷時
聞竹紅粉樓空似
有人留得金門編
貝齒從來只戀一
囊貧

褚集齋購菊數十盆
列斗室中因奉饒尖

團十雙以佐飲並詩索和

秋光吹到十分濃絕勝東籬寂寞容稻蟹釘盤猶

似虎

唐彥謙句晚稻初香蟹如虎

酒人入座果如龍拍浮誰足

平生志流浪終難笑口逢差喜尊前知己在不辭
花影倚千重

寒蒲幾輩縛輕柔應識饒涎共麴流敢笑悞人來
爾雅不同乞郡比監州花光散眼紅千纈燈影橫
簾翠一鉤過盡重陽驚序晚天涯長覺此身浮

先兄歿已周期予喪服雖除猶未得憑棺

一慟書此志哀

付苦心長結迴腸淚暗流生離逾一載死別竟千

秋地下鵠原聚

姊氏三人皆先歿

天邊雁影愁欲持尊酒

奠祇是恨淹留

屈指時猶昨驚心服已除魂知應戀別事往尙疑
虛不識彌留語空存宛轉書那堪逢諱日重說孟
冬初

集齋主人餽米一斛賦謝二十韻

昨宵旅魂驚忽夢飯饒溢今朝踞竈觚凝想爨煙
出果然長鬚負五斗闔入室不須向市賒但見壓
肩熱自我被飢驅十五看圓月欲買下水船歸計

未遽必廡同梁鴻賃食少陶潛乞腹虛學蟬餐腸
細類螭結所嗟食無魚安得田買秫瘦非作詩苦
炊或疑婦拙感君動高義致此聲牙潔貧兒欣暴
富一一盆盎列門啼幸無聲鬪恥已可雪庶免三
毛嘲豈僅雙弓啜索非同侏儒餐自勝粗糲傲彼
倉雀空防此梁鼠黠故人非胡奴受之敢不屑世
無范氏舟此誼向誰說我本無宦情作吏期異日
不圖君惠來再拜腰已折

過學使署有感二首

春風化雨久生涼周甲重看事渺茫賸有遺孤泥

指爪更無多士玉班行三秋鼓角傳悲語一片旌
旗戀夕陽飛徧烏衣空復爾如今王謝亦尋常
街名三道記無差低首轅門暗自嗟往事何人重
在口當年此地正爲家金鋪雨浥雙鑲冷絳帳風
飄一角斜莫道宮牆桃李盡我來也作路旁花

老林行

荆宜鄖竹山連亘萬木陰森塞山徑此中不測如
深淵巨猾元姦易亡命厥名爲老林奇險未許相
追尋年來楚匪跳梁久中間盡是遁逃藪去如鬼
魅藏來如風雨集散如蠶螫飛聚如螻螳蟄昧然

而往不可窮猝然而遇不可執況兼四達多歧途
彼雖能出我難入天生叢翳爲賊巢消息何由知
緩急我謂上策宜火攻焦土一炬阿房同仆其大
者使斷道焚其小者俾目通外以嚴兵截要路內
以勁旅搜潛蹤雲馳電掣生融風驅遣回祿爲先
鋒草閒狐兔無所容次第自見殲除功雖然玉石
難遽辨烈燄何惜崑岡紅卽今大功將告蕝母令
餘孽依爲壩從茲有險不得據其利豈僅當時逢
將軍將軍計須決燧象火牛古所設寧教一地作
飛灰猶勝千村流戰血豈不聞擒賊必先擒其王

得虎終須入虎穴莫使王多賊易成莫使穴多虎
偷活

醉歌行次褚集齋韻

我生不學麤豪流目光如炬髯如虬亦復不學通
眉長爪跨驢客古錦囊中鬼句擲也曾挾策求美
官自顧骨相終酸寒惟有一枝雕龍繡虎筆雲馳
電掣人天慄手定千秋業須早兩漢三唐恣探討
十萬心兵鬪不降五千文字餐能飽天涯何惜苦
淹滯不肯生爲稻粱計位置身居泰華巔吹噓氣
吐虹霓勢世間名譽安足憑文人自古多相輕此

曹易敗乃公事那識吾才比犀利共君日日居齋
齋此口只如謝淪開但得聲名真不朽何用慷慨
傷天懷我高歌君飲酒上挹天漿翻北斗等是神
仙富貴身不羨纏腰與綰綬

題吳南池贊府

鵬

看劍引杯長卷

吳時爲
天門丞

我聞南池名有如貫耳雷後讀南池詩蒼莽不受
格律裁又觀南池書頗似庾秋之穿雖淋漓元氣
入紙墨腕底似欲生陰霾雖然心許顏未識疑是
兩脰毳偉溫終葵

用唐撫
溫定事言

如斯之人洵奇傑安

知非鬼非仙才橫圖乍展知君在却被旁人呼駭

怪

楊二農稱之爲駭怪

蓬心老守埽敗煤

圖爲王蓬心太守筆

紙上雄

心迴難耐一杯吸盡瀟湘秋一劍舞出伊涼州醉
中睥睨不平事虎氣直上風颼颼昔年曾唱從軍
曲脫却朝衫換戎服衣韜犀弩夜傳詩紙擘羊皮
曉書牘萬箭雕飛大翮雲一鞭馬歎流沙玉蠻府
營前戰草紅巴山叢裏陰燐綠知君渾身有膽氣
劒插人頭酒貯腹何不乘此徑破崑崙關黃金之
印貂蟬冠胡爲翻然掉頭去哦松臥理山城閒昨
趨大府來乞面知我在門不相見君不見我我識
君畫圖仿佛飛將軍攫君之酒在我口奪君之劍

在我手一樣雄豪孰不如始知結習終嫌玃吁嗟
乎文章政事具一身願君努力期于春丞兮丞兮
寧負人

南池自闕其應事曰誓不負丞

題梁六雲巖

傳綰

種藥圖

梁工醫

一卷青囊佩未空幾行朮序寫應工底須石髓採
懷綠早見丹砂注頰紅筍屐踏殘芝院雨桐衫吹
冷橘林風從君擬乞金鷺藥添我鴉鉏入畫中
長生宿願久疑非臍得飛龍骨不肥小草自應成
遠志靈苗終竟愛當歸難期他日攜貂採祇覺前
身鍊玉稀飲取上池勞扁鵲未容苦戀越山薇

嘉平十二日發漢口

天涯風景逼殘年，且汎長江下水船。
久客自孤兒女，望迢歸翻動友朋。
憐探九消息，同時警時沿江多盜。
聞笛情懷一例牽，大別山高回首看。
黛痕已是隔寒煙。

搶風行船遇橫風張帆經緯而行謂之折搶此技惟江船能之即庾闡揚都賦所謂艇子搶風是也搶去聲

橫風吹向船腰過，江船走江如織梭。
經行不憚來往數，一葉剪斷江心波。
風帆取順不取逆，此獨以逆劑一格初從逆勢用其紆繼以順勢得其道。

將欲取姑復與要非枉尋僅得尺峭帆時卻或時
張遠岸乍南還乍北船舷貼水疾若飛濺沫十丈
生珠璣縱橫馳騁多快意那識世間有難事我悟
此法爲文章逆筆折筆同挽強善逆始易占地步
善折自可留堅剛楚江老板多嫻雅帆脚能將一
手把收放分明控縱如真箇使船如使馬

泊黃州江岸不及入城晤黃岡顧伴榮明

府奉簡二絕

離情江水兩悠悠欲駐蘭橈不自由誰似故人情
意重西山招我入黃州黃州對岸卽武昌西山

客心如箭歲將闌咫尺何期一面難遙憶使君官
閣坐不知江上有人寒

赤壁

赤壁不在黃州自是東坡之悞按圖經
嘉魚有魚嶽大崖之山瀕江爲赤壁北
可望烏林陸口宋謝枋得曰予自江夏
沂洞庭舟過蒲圻望石崖有赤壁字其
江岸曰烏林亦曰烏巢上有周瑜廟此
爲孫曹戰地無疑於史有合蓋古蒲圻
地今屬嘉魚黃州之山自名赤嶼地志

所云赤嶼距閩而近北望武磯是也亦
名赤鼻見水經是誠不必爲東坡諱然
七百二十年以來人口膾炙兩賦有辨
之無從辨者足見考據之學終不得與
文章爭權

往來過黃州口熟東坡賦赤壁與赤嶼心識此公
悞曹瞞走華容宜向上游泝安能於此地始與周
郎遇一十二甲子無人指其故祇覺前後遊緬想
有餘慕武昌夏口閒每爲前賢護山川與道里差
謬不復顧始知攷證功不及偉詞鑄試反問坡老

坡定一笑付惆悵歲壬戌恰值支干數風清月白
中我亦來兩度

南溪晚泊

茅屋江村小沿流繫纜來殘年風色緊荒戍角聲
哀身外餘詩卷燈前泥酒杯推篷霜月迴爲我獨
徘徊

田家鎮

繫纜蘄州路村墟一向斜隔江山作障壓岸水爲
家滯客憐明月孤鴻入晚霞鄂城知己在應是念
天涯

龍坪大風歌

連朝晴暖如春和船牕日日南薰多天公轉面作
喜怒驅遣百萬風中魔南風頃刻轉作北更有東
風來併力江雲下低水上立江天乍黃江面黑中
閒滾滾排銀山倒捲濤頭如雪白江狹喜風向風
拜出水揚鰭意誠快我船拋擲在江心但見長江
生萬派船舷壓水船底空船尾乍西首乍東浪花
歡來如猛雨一氣併注船艙中舟人五色盡無主
長篙短櫂難爲功忽看水勢共激宕砰然直出船
篷上船頭過水船不知始信今朝能破浪須臾宛

轉臨江臯競將鐵鹿江中拋沙麤水急鐵欲折笑
擲吾生付頑鐵

翌日風不止寒甚午後雪

日日維荒岸篷牕黯不開驚沙三楚合急雪九江
來入夜防肱篋因寒強舉杯家人應念我歸計費
疑猜

篷底低頭坐寒威入罅侵攢風千舫亂韜日萬山
沈寥落琴書氣難危道路心那堪歸去意留滯復
如今

予去鄂城同人畫寒江送別圖題詩成冊

以寵行一時賦者十六人爲詩三十三爲
詞三圖觀察爲之弁言江上阻風三日篷
牕枯坐因憶冊中人各成一絕以紀知交
之盛

圖雙峰觀察

勒斌

冬春雨載共追歡別意先從一序看
媿我才華非
屈宋可容他日作衙官

周築東秀才

山

江左周郎見性真詩篇梅萼雨清芬
到家正值寒
香發折得還應轉寄君

築東善畫梅寫一枝於冊尾題贈江左周郎君小印

也

褚集齋秀才 全德

豪情萬斛酒千卮贈我長篇兩幅詩手拔蝥弧稱
上將堅城誰敢近偏師 集齋善飲詩才奔放冊中見贈兩長古豪邁不可一世為一時之冠

劉賓叔上舍 方暉

豈是書生劉魯風 萬里書生劉魯風唐人句曉行曾入畫圖中
不知青笠紅衫裏誰譜燕支樂句工 賓叔將北上因取劉一止詞意畫曉行圖屬同人賦詠

武昌丁琴泉太守 雲錦

先生舊本玉堂人五馬分符鄂渚濱載得明珠江
水暖始知有脚是陽春

褚睂雪 爾錫

春江未返寒江返 君先有春江返 擢圖屬予題 昨夜篷牕風雪

侵抱得黃金鳧藻暖始知千里故人心 時以張鑑一枚贈行

梁雲巖 傳紹

擾擾紅塵老客顏藥欄誰似占清閒從君更乞長
生術只笑生來骨太頑 雲巖工岐黃之學有種藥圖

褚菊溪 尙德

西洲曲體劇酸哀使我離愁撥不開記取故人珍

重意連朝打槳過江來

時客漢陽陳梅村明府幕冊中詩倣西洲曲

石漁春庫使

萬泰

年來相見悔蹉跎纔許盟心別意多好句識君真
面目菱花何用影重摩

漁春有觀我圖

湯息帆山長

晉錫

春風吹徧讀書堂問字門前弟子行安得一杯陽
羨茗與君吟對葉深黃

時主勺亭講舍有讀書秋樹根圖

褚理齋

聲德

江陵一去幾時還

時就聘江陵

休把相思說等閒同別

鄂城誰更遠與君又隔萬重山

錢秋巖 逢年

奉旨填詞亦可人
錢郎刻意鬪清新
多情一曲歌南浦
江草江波不是春
秋巖刻意填詞風格在蘇辛之間會填南浦一闕贈行

陳龍田秀才 普生

靄園風景足盤桓
時寓劉氏靄園
吟到梅花歲已闌
昨夜

卷簾風雪裏定憐江上一船寒

林雨南孝廉 沛

白沙江畔本君家
漢上相逢等客槎
我住吳頭君住楚
算來都是在天涯
孝廉本真州人近占籍江夏

許成伯 汝器

丁卯橋邊識許渾天涯落魄敢同論相逢猶隔風
塵面空說杭州舊酒痕成伯與子同里不相見者二十餘年矣年來同客楚而彼此不相聞成伯在興國偶見此冊因賦四斷句惜忽忽終未一面也

女弟子石織蓉

十三弟子女相如曾羨隨園老祕書一箇娥眉終
未識至今慙負綠牕虛織蓉雖問句法于子終未謁見袁簡齋先生有十三女弟子圖子曾爲題句

馬當

王勃當年經此地江神相送風帆利南昌路隔七

百程却使輕舟一宿至滕王高閣序文工從此才
名千載異江神居然解愛才成就聲名不相忌人
生若盡如江神世閒那有窮途淚如何但助一子
安此意未公吾竊議我本無才神未知安敢妄生
非分冀今朝也過馬當山安穩江流如置器乘風
放溜疾于梭二百郵籤僂指記連朝淹滯忽稱快
此惠非神更誰畀憐予久客在天涯急送還家紆
別意低頭再拜謝江神神實有心非偶值翻勝區
區一少年浮名畢竟成何事

發皖城十餘里北風大作回舟復泊皖城

昨朝偶快趁今日復淹滯天公慣相妒又遣石尤
至石尤何足論有怨亦有恩恩留去家客怨阻歸
家人歸人何復阻經歲天涯苦江波欲送人長風
怒如虎願乞天公情毋再風浪生往來無不可恩
怨兩心平

夜來泊皖城曉發皖城去狂飈吹回舟又向皖城
住昨日有隣船仍在舊泊處意其與我同對之慰
相遇隣船笑且言我本安吾故清晨望雲氣顛風
當斷渡果然北風厲其勢不可忤自喜逸待勞幸
免復來汭我聞媿斯言前事悔太遽始知能見機

只在善退步

夜泊大通

斷岸居人屋連檣估客船月虛魚腦滅風勁雁沙
圓緩緩愁征櫂堂堂感賸年荒村寒柝緊驚起夜
無眠

荻港

驛路山寒裏

此地爲繁昌水驛

人家水氣中到門殘雪白

隔岸夕陽紅斷塔依岡轉危樓入戍空去年帆影
地又趁一江風

迴龍閣

寺門高閣暮霞平俯瞰長江萬里橫空外聾蟲升
夜氣天邊宜鶴下寒聲風波誰唱公無渡香火還
祈佛有情記我征帆前度過一般孤塔望中明

祀竈日泊舊縣舟中多楚儅楚俗以是日
爲小年競市酒食爲迎年之需予征途遲
滯恐不及歲內至揚惘然賦此

爆竹聲繁不耐眠孤篷鄉思鎖相牽幾回客裏忘

佳節

予不在家度歲者已四次矣

一夕天涯感小年迎歲底煩

傾柏葉卜歸應是費金錢江風倘與征人便猶及
黃羊未祀前

蠟磯夫人廟

蛾眉遺恨滿江東交到孫劉竟不終異國婚姻原
寇敵同時夫壻盡英雄傳虛蜀志心難慰祠冷吳
天貌已空可惜輸他姜氏智未能謀遣晉文公

江水煮江魚二首

江水煮江魚水清變成汁當時水面寬今日釜底
急可憐生死託江波猶勝枯魚過河泣
江水煮江魚魚骨水中吐魚骨入江中原是舊游
路可憐生死託江波猶勝枯魚銜索蠹

歸舟雜述得十五斷句

經年離別恨如何歸路寒江渺渺波一樣舟人載
行客來時情少去情多

龍開河接九江關退盡江流小艇閒愁殺停橈往
來客不容留眼看睂山龍開河乃九江關泊舟之處多蛟船往來入冬則涸
無寸水

心如渴旦夜難明身比魴魚尾更頻又著一行鴻
外雪飛來泥爪豈無情

歸心如此欲留難翻恨江平少急湍自媿才情非
下水未妨搖漾看晴瀾

小孤山石削陵嶠兩度來過未許登曉起推篷看

晴雪一枝寒玉瘦無棱

江風吹雪暗行舟兀坐篷牕日日愁心不長愁人
不老江波也復變西流

漁舟橫列大江深不怕風濤晝夜侵此輩生來亡
性命莫言徒有羨魚心

紛紛暮靄入看無誰寫煙江疊嶂圖我在煙中渾
不覺前帆千葉已模糊

江中晚風初定長煙浩然此景最難摹寫不知當日王晉卿煙江疊嶂圖有如此否

蹴天高浪旅魂驚繫纜心神始乍平且把一杯聊
自慰再從來日問吾生

采石難尋捉月蹤每將此事恨天公杜陵牛炙青
蓮酒了却文章醉飽中

江上青山染黛螺此來蕭瑟竟如何畫家采色文
辭豔濃處終勝淡處多去秋看江上諸山濃色可
掬今則彌望寒林蕭瑟而
已必以淡遠爲勝者亦是偏見

梁山相對碧濛濛西去巢湖萬頃通莫道此中天

塹險却將門戶鎖江東

梁山東西對峙東卽博望
山以西對故名東梁山

總謂之天門山西屬和州東屬太平之當塗大江
一門戶也西山有路通巢湖

嵯峨大戢壓奔瀧闌檻高於萬斛艘白浪如出天

上坐夜深打鼓下龍江

江中大戢如十間屋闌檻
悉其夜深燈火照耀順流

打鼓而行亦頗壯觀過龍江關始改棧

寒風只合北來馳偏要西南向客吹未免笑人封
十八一生何太不逢時

江行下水全賴西南風而
隆冬偏多東北兩旬之風

得西南者僅一日

應是家人日計程天涯歲晚客心驚歸期絕似黃
梅雨說了晴時又不晴

江上大霧三日

東風吹來三日霧長江混混疑無路舟師捩柁不
敢開只恐船行天外去推篷反疑天地窄天水相
看無二色不知是天下低與水平或者是水上升

與天逼兩者茫茫不可測但覺漫空高下一氣積
一船以外無所見只看船頭人已隔船如入水有
萬重人似去天無一尺初謂濛濛物當是降自天
及來江上看霧起竟從水面上薄如雲煙半空未
至遽密布頃刻天水相爲連大抵霧有山氣及水
氣此是江氣凝結所使然靜觀物理或如是雨露
不盡皆天專水精宮中萬蛟蜃仰口冷吐氤氲漚
浩浩漠漠相緜延一白萬頃茫無邊我聞黃山之
雲能作海方之此霧何有焉輕風徐來波不涌耳
畔時間柔櫓動櫓聲隱約無處尋寒意襲人帆影

重

雅雨山人詩冊爲葛二林明府題

德水聲華已渺茫却從遺冊問滄桑分明風格郎
錢在莫認新城一瓣香

烹羊終荷

主恩寬出筴持籌事本難只有淮

南舊雞犬升仙猶是憶劉安

壇坫宗盟往事空才華一代水流東無人說士什
干肉長對孤寒弔寇公

廿四橋頭蹟尙傳有人遺恨說前賢市門拾得殘
叢字指點龍華小劫年

題應叔雅秋山獨往圖

時司訓新昌

人生出山後求仕君乃欲仕先入山朝衣手版拋
不得置身翻在煙霞閒青山都厭揚州俗只向江
南鬪蛾綠作意招君歸故鄉一路看山猶未足名
山自昔說剡中看山直過之江東廣文官閒少公
事絕勝崔立哦雙松同君卅載刊江住君話家山
先我去去年我方客武昌送君不及憑詩章一官
好當買山隱獨往但藉紅藤屨嵐光翳空天漠漠
雲氣市地煙蒼蒼松毛三尺埋古徑澗水百道懸
飛梁梅花大鹿飯紅葉繚衣仙鶴開元裳金庭天

姥距咫尺爽氣入骨鬚眉涼山中人逢苦未識悞
疑晨肇呼仙郎嗟我無端墮塵網眼見名山不能
往惟君將去太不廉展卷如聞雙屐響君不見青
田之酒好顏色太行之泥堪飽食不比君家苜蓿
盤肯讓先生等聞得他日相從事探陟不學初平
作牧兒要同靈運稱山賊

無錫侯小坡來遊揚州不遇而返意殊怏
怏臨行賦五古一章留別因次原韻二首
故人別經年暫喜數晨夕如何未兼旬又復離緒
惜自我去故鄉卅載明湖隔君昔客湖邊邂逅快

良覲良覲亦已遠去去竟何適天涯相見難此會
非偶得依然送君歸令我長太息夜來夢隨君飛
墮九龍側

丈夫迫飢寒不屑謀朝夕逢人恥乞憐昂藏一軀
惜巍巍彼上游每與常情隔比人於魑魅深居不
吾覲中論云不出戶庭居室室之中雖魑魅罔兩將不吾覲而況于賢人乎我嘗竄
其意彼亦隨所適豈必無逢迎未許寒士得鵬翮
垂天雲且作六月息看君如鶴雛休過腐鼠側

題杭芑野小松吹書堂圖

芑野爲堇浦先生族孫先生舊居有松

吹書堂一時諸名公所譙集沈榜崖爲
作圖題詠殆徧後堂別售而圖亦流落
不復見者二十餘年嘉慶戊午芑野於
城南汪氏次風所見之汪卽舉以贈芑
野喜獲故物復屬奚鐵生畫小松吹書
堂圖以記其事今年春郵書屬予題後
爰成長歌一篇奉簡爲圖幸更爲芑野
幸也時癸亥夏至後二日

太史杭公我父執早年掉臂金門入班揚名姓萬
人傳跌宕巖廊但長揖偶然應詔來上書狂言

共笑迂儒迂

九重寬大有風漢翻然竟返田

閒廬田閒草堂號松吹滿院陰沈積寒翠時見蒼
苔萬瓦平乍聞麤雨空階墜是時裙屐相招邀鴻
儒談笑同遊遨堂中日日盛文讌下筆蘇海兼韓
潮東陽先生埽螺黛不紀以文紀以繪有聲畫與
無聲詩展卷其人如有在紅羊小劫換滄桑羣公
盡入修文隊舊時賓閣悄無人景物依稀已難再
奇礪不爲到公留輞川翻見王維賣花雖識面路
偏歧燕仙思歸簾早礙此堂歌哭已無緣此畫雲
煙更同嘅宛轉逢人什襲珍流落至今逾廿載城

南汪氏偶得之寶此名蹟常手持一朝奉璧竟歸
趙堂構分明說完好重撫舊物入新圖前後風塵
傳畫藁太史之居尙有所我請爲君僂指數君不
見橙花館補史亭寄巢逢秋禊事成桂堂池上寒
花明先生有寄巢秋禊詩又歐安得從君一一寫
絕勝買隣朱季雅

次韻陳梅垞藉隱山房六詠

藉隱山房

藉隱非真隱而以隱爲志君看朝市閒亦有隱者
事

寒木春華檻

寒木著春華正是向榮者底須抱冬心寂寞衡門下

秋吟閣

秋光展長天秋氣生遠樹終朝倚閣吟識盡秋來路

筱屏

植筱列作屏合配松風石颯然涼意生
媚此煙景夕

臥月廊

廊深得月多牆外花影送敲枕看清輝分得涼蟲夢

七峰草亭

巫山五尙虛九華二未列合喚七星巖竹林共怡悅

輓汪繡谷

兩載燕臺復楚江與君相見動參商

予自都赴楚與君不相見

者二年比歸而君疾已不起

只憐丈室還依疾豈料修文竟作

郎長爪通看李昌谷微雲疎雨孟襄陽卽今風格知何處隣笛聲中倍自傷

重城消息斷兼旬撒手初禪自在身塵尾已空今
日影蟲書猶殢昔年塵君嘗爲予作雁行中路偏
憐別謂令弟劒潭司馬慕草經時久不春謂家孝廉友棠君姻也賸
我離羣江上客白頭王建是詩人

六月二十一日曾賓谷運使招集同人爲

歐陽公生日

一葉龍門早報秋

先一日立秋

題襟高館讌清幽已從

畫荻思初度還擬傳花作勝遊
千古文章賢太守二分明月舊揚州
柳靈寺畔書堂在江上嵐光隔
座收

軋苗先教勒帛紅習除太學體應崇但將風節祚
朋黨不畏讒言肆計攻書疏能回四參政江山只
重兩文忠辦香久作低頭拜七百年來更祝公

乞巧圖

柳絲霧重秋庭滿銀漢流空水紋緩青瑯西南月
未弦金飈涼入羅衣短黃姑織女經年隔聞說良
期逢七夕誰家窈窕出當筵細果妍花照瑤席此
身原是薛靈芸乞巧重將篤耨熏仙郎此際貪良
會絮語淩風恐不聞別有深衷難具述俠拜低鬟
秋瑟瑟非關餘伎乞天孫轉把前蹤問靈匹明河

清淺豈難過作駕何須鵲許多不向西王扶鳳輦
但教丁女得金梭佛堂梨樹千秋怨長生私語成
虛願驪山盟誓竟無知汾陽富貴偏操券默默雙
星欲對難花鍼綵縷本無端天上已拌離別易人
閒猶作畫圖看鏡塘蓮影沈沈翠髮膩蘭膏燕釵
墜侍兒剪斷九華燈回頭照見鴛鴦睡

東坡石銚用集中原韻二首爲尤貢甫

蔭

題

石銚昔周種餽坡公煎茶具也貢甫得
之庚子歲入于天府貢甫繪圖以索

題詠

一勺甘分慧日泉坡公胸次水雲寬聯吟敢笑龍
頭蠢活火寧愁石髓寒春甕夜瓶應共貯詩腸酒
吻幾曾乾回思試院同煎日未與埤塘位置安
湯瀉銀瓶識煮泉注來雲液此中寬品歸天上
恩長暖畫到人閒色尙寒永憶前賢山茗熟未容
名士墨痕乾水村一老增惆悵水村尤號也賸有匏尊
好自安水村時又得東坡匏尊

簡松草堂詩集卷二十

錢唐張雲璈仲雅

褚集齋書來兼示近什奉懷四章卽用來
稿中送劉賓叔赴深州韻

明珠脫手似探驪
喜對君家幼婦詞
大別山高春色斷
語兒鄉遠客心馳
天邊宿雁黃蘆冷
江渚游鱗素札遲
欲折梅花憑驛寄
不堪橫玉動離思

江上帆來雨似塵
紅橋曾共駐閒身

今年三月君隨圖雙峰觀

察督糧過揚會共遊平山堂

霞從謝朓吟餘晚
柳向王恭折後

新對酒情懷容太放
賞花心性豈嫌真
平生早泯

差池味長爪通看是故人

分明香火有前緣客裏相逢總後先碧草綠波空

復爾紫檀紅撥易生憐飢腸已飽監河粟

去歲客楚蒙君

餽米二次傲骨誰叨建業錢回首漢南分袂地天涯風

雪又殘年

多才聞說得迎逢賓閣初開倒屣中

時方就德安太守之聘

綠髮韶華爲客減青箱家學到君工名花定豔三

春雨高鶚須搏萬里風寄語曉行劉一止莫教迷

路夢魂同

謂賓叔

夢竹圖爲湯甥等題

昔有黃梁夢滿抱塵懷受嘲弄又或夢羅浮覺時
翠羽啼清愁最是西湖雨山竹到處修篁蔽天綠
自從作客無此君始信難醫惟有俗疇肯往往夢
見之篩月籠煙徧山谷靜中相戛暗中間一片敲
秋響風玉醒來追想境已遷仿佛過眼成雲煙安
得從人一一寫令我魂清氣瀟灑吾家阿士先我
心披圖幽意殊惜惜深宵未展清簟冷白晝早闕
虛堂陰故園寂寞誰爲主日抱鄉心作鄉語我來
共爾北牕涼分得龍泓萬竿雨

單竹軒簽判

渠

轉饒川西王坦齋

遵路

寫

錦水重遊圖並賦詩送行因次原韻二首
嚴城一路肅驂騑
槌壁何須笑
八騶犵鳥蠻
花知舊使紅衫青笠記
前遊錦江水暖沙棠柑
劒閣霜寒翡翠裘
莫道監州符似火
且憑綢紵暫句留
雅量何人識
柳崇連城名譽占
南東華峰蓮影長
迎客蜀國絃聲易
惱公驛路醉依金雁酒
唐人漢州詩十
金雁驛離心
吹滿玉簫風
披圖自覺心情壯
指點當年叱馭同

疊韻再送竹軒

雲關雪棧趁駟騶
無限離心托絳騶
世事崎嶇皆

蜀道詩才雄麗稱豪遊去時風影常敲帽歸日飛
花定滿裘遙憶蛾斜山畔月空梁顏色夜長留
大府憐才望久崇幾回凝盼馬頭東脂非處潤原
甘拙事到難爲盡屬公鄉夢又醒叩竹雨歸程偏
隔荔枝風北山自有王臣慨始識賢勞一例同

病婦

深屋寒燈小重幃藥氣濃腸空愁宛轉夢斷語惺
忪辛苦營巢燕伶俜出骨龍那堪三載病無復昔
時容

歲晚雜感四首

束竹爲腸不許寬靜中心緒最無端金尊澈盪空
拋醉雪腋蒙茸巧耐寒知己定非三語掾駐年難
得九還丹近來萬事蹉跎甚莫笑鮎魚未上竿

玉佩居然利走趨此中情事每憐渠禍生刺在空
三歲惠氏才多豈五車鶴木無心通閬苑烏防轉
眼卽儲胥莫言胸有靈犀點畢竟輸他綠竹虛

碧海神山果似仙侯門同此絕傳宣定知阮籍能
爲眼只許洪崖慣拍肩座上檀槽花十八堂前珠
履客三千不知世有林君復又抱寒梅過一年
貧無旨蓄御清冬命似黃楊厄間逢碧落斷行憐

去雁

今夏連喪兩從弟

紅閨瘦影等飛龍
鑪薰久共迴腸

熱香篆終輸別意濃
侍史不知吟太苦
鎮將牋紙

養芙蓉

清明日曾賓谷都轉
招飲以婦喪未赴用

玉谿生集中王十二兄
與畏之員外相招

小飲予以悼亡日近
不去因寄韻

嘉會難追玉佩行閒
愁空賸碧衣郎定知
歌舞春

如海那識淒清月到
牀仙籍死生誰可注
中年哀

樂幾曾忘不知世有
繁華境翦斷蘭煤漏
點長

哭亡室穉氏十首

我生重交遊落落數儕偶君於深閨中本我一良

友一旦棄我去如失左右手昨年二豎來纏體若

結紐春初勢增劇穢氣上衝口其病爲奔豚潰決

不可守稽之於月令在腎其臭朽

病中氣逆而穢醫者謂爲奔豚

之氣蓋腎氣也

平時境屢空長物一無有常爲無米炊作

巧理難久想其數十年結轡莫能割用是竟不起

執此將誰咎我不解藥方對之但搔首及其遽奄

化空自呼負負誰言奉倩情翻遜莊生告

顏氏家訓荀奉

倩神傷而卒非鼓缶之情也

君本善刻苦隱忍意每堅諱疾正其性不受旁人

憐苟非大疲紉未肯偶自便我覺其強支幸不甚
危顛以此遂因循豈料遽纏綿不知將欲死猶冀
或速痊此心誠憤憤此意空拳拳世無盧與扁未
能制於先及知不可爲策已無萬全悔之骨屢折
思之神欲癲他生未容卜同穴會有年縱至於此
時何以贖吾愆

君爲宰相女我爲侍郎兒緬維甲第初見者生羨
辭君不自相貴操作皆親之動容無疾遽出語無
支離作事必遠到不以朝夕期亦頗耐繁劇纖悉
無或遺物經所手製堅固不可移所性類如是似

於壽考宜而竟不下壽人事將奚爲左右臧獲流
待之一以慈爲言家貧寒若輩無所資不忍動相
繩亦未敢嘻嘻居心類如是富貴常有時而竟死
貧賤天道安可知

安仁賦悼亡讀之每哽咽萬一處其境腹痛焉可
說自謂不至此此想可無設不料事遽來忽然作
死別生別心已摧死別腸欲裂生別兩相思死別
一情結亦欲爲達觀強以理自決觸景悲中來轉
念憂更愒豈必望廬思何地不酸切豈必入室想
何物不陳列始知騎省言哀情猶未徹昨宵風雨

寒殘燈耿將滅牀頭點鼠來伴我影單子

自從阿兄亡死者遂紛起一年喪一孫一年喪兩

弟三載未滿二四見丁男死

兄藥樹歿于辛酉十月長孫餽殤於壬戌

六月作人用儀兩從弟

連遭於此極宜謂可以止

豈知新春來復斷我連理斷者形已分連者心未

已皇天雖降罰慘酷何至此同母共五人一兄並

三姊今皆一無存所賸孱軀體邱嫂老無匹今又

亡厥姊若以此例看吾亦安足恃憶我未弱冠家

運曾遭否父叔暨弟輩喪亦五僂指今昔抑何類

難問彼蒼彼思今更傷昔淚下如鉛水

故鄉隔千里旅館作殯宮平時主中饋行坐此室
中今卽厝其櫬猶記生前蹤當戶懸素帷颯然生
悲風暝色四簷起仿佛來聲容容容不可再祇許
夢寐逢夢中不道死仍與常時同醒來更悽斷恨
茲牀簾空畫師圖其貌百分無一工縱令極相肖
焉得精魂通盤盤篆煙裊泔泔蠟珠融事以神靈
道再拜生肅恭奉以孺人號虛冀他年封生時薄
滋味祭之乃從豐生時不飲酒奠之必一鍾手折
薄命花來作膽瓶供思君淚盈掬灑徧花枝紅
記我先慈背雨雪飛濺濺堆銀積瓦棱融素流堂

劫君時襄大事忍寒立深宵僕隸奔走閒足跡泥
塗交明將有弔客埽除敢憚勞仰視屋上雪隆然
二尺高不愁因風凍直恐見硯消流澌四阿注濁
水中庭滄何以肅賓從衣霑步亦撓君乃命圻者
上屋如升猱奮帚滅其蹟眼見滕六逃詰旦果大
霽簷寂無喧囂旁觀歎其智吾謂意亦超卽今君
歿時雨雪方連朝誰能相料理衣復空呼臯

前年阿餽死時我方客楚君不令我知書來作譚
語翻道病漸愈可以無所苦恐我傷懷抱念我久
羈旅以此強相慰其意實慘沮今君但焉化愁痛

入肺腑此痛更十倍君欲慰何所喚君君不聞哭
君君莫暗靈兮倘有知地下磨自拊

長女隨夫壻遠宦歷下城五年不相見念之心忤
忤君性夙伉爽頗視離別輕雖然祭必祝不類兒
女情至其彌留時忽呼女小名自言傷心甚語澀
淚已傾可知其平日默默常爲縈昨朝女書來得
訃不欲生記其別母時永訣自此成眼前諸兒女
晨夕多哀聲憐近復憶遠方寸萬念并見聞無一
可願早薨與盲

出入動相面攢笑無不悉今忽不見君猶疑在別

室豈知黃腸器藏身早周密可憐明慧人到此抱
空質置爾帷堂中塊然同一物雖經隔幽顯對之
且終日麻衣兒女輩猶似繞汝膝荏苒時序遷轉
瞬已終七從茲至百年不過此日月假仰七尺棺
曼曼夜如漆縱未歸重泉其理亦如一李氏非無
靈妙予究何術萬千哀怨意此中如有失萬千憐
愛語有口不能出

神傷四首

萬古傷心莫問天東風吹冷藥爐煙難從往事頻
回首怕向韶光說比肩錦瑟斷來絃五十

前輩解
義山錦

瑟詩謂瑟本二十五絃破之則五十矣以寓斷絃之義此說最精 華蓮證就劫三

千扇紈鏡檻都陳跡長對繁英泣逝川

百分明慧萬緣空遺挂長教入望中鬢影釵光新

繪畫帳煙牕霧舊房攏紅薔菱雨春無賴紫燕憐

人語未工賸有二毛潘騎省重衾誰復歲寒同

繁欽贏得淚連絲幽恨濃香瘦不支玳瑁牀空憐

獨守芙蓉紙小記相思人閒金盃無消息天上銀

灣有會期輸與當年崇讓宅一春蕭洞見辛夷

藥府空歌起夜來珊珊環佩幾曾回簾鉤挂月經

時冷牕網驚風著意猜心種碧蓮長帶苦淚拋紅

豆不堪栽柔腸更比鑪薰熱微雨黃昏感阿灰

喜單二竹軒歸自川西卽題其蜀行卷後

仍疊送行詩韻

歸及東風躍紫騮高軒重喜聽鳴騶人來錦水餘
春色路上青天始壯遊蠻語又傳新樂府豪情何
惜舊貂裘羨君滿載奚囊句勝地長教姓氏留

巫山巫峽望崇崇又趁岷江一櫂東萬里鴛花憐
杜老二年魚鳥識坡公馳驅易下臨歧淚事業終
看到岸風

君詩有安身全在拙帆早之句

莫道此行來往速王陽

回馭意原同

梅雨經旬閒寫岑寂之況十首

綠樹當牕復映門東風吹雨易黃昏
絲絲濕徧闌干角似與愁人比淚痕

粉香淹盡舊羅衣並坐偕行願已非
燕子不來原解事惱人胡蝶又雙飛

愁心和雨太縱橫厭聽花梢點滴聲
脈脈向人無一語不知石闕口中生

苦霧濛濛潤碧紗綠筠簷外數竿斜
空庭盡日無人跡開徧沿牆淡竹花

賦罷潘郎鬢已摧尋思往事不勝哀
自憐曲曲柔

腸裏一日能禁九萬迴

箇中情味少人知終日昏昏強自支幾度欲眠還
又起起來長似未醒時

冉冉年華逝水侵夜臺蹤跡杳難尋卸來一縷如
雲鬢盤在空奩直到今

粉垣濃壓墨雲低淹浥庭柯意轉迷一个翠禽花
外暝風華如此也單栖

鏡中金翠畫中身瓊瑤珠璫總不眞昨夜名香還

入夢可憐無復緩歸人

緯略引夢書云夢得香物婦人歸也

閒尋芳草繞迴廊慣看蝸涎上短牆只道靜中無

一事豈知心地有滄桑

汪宜人小像爲洪吉士

錫謙

題卽用冊中

吳穀人司成韻二首

錦瑟如人一例橫那堪重問玉谿生春風望斷雙
鵲影哀軫翻調寡鵠行荀令涼肌中夜恨曹婆叢
鬢昔遊情桂香長見金魚合深鎖閒愁似列城
幾番悽斷九迴腸入夢猶看手共將不信靈娥還
竊藥無端滄海易生桑留機殘錦終零落替月圓
姿總杳茫冊題小像
固無像也等是無人簾在地潘魚陳鳳
雨成傷

看秋海棠有感二首

斷腸怕見斷腸枝一片珊珊影不支
記得去年風露裏紅羅人瘦晚涼時

曾聞淚是此花根相對臨風面有痕
化作秋來萬行雨滿庭寒綠葬花魂

家燕客

國華

招食炙鴨賦此志謝得鴨字

晨興食指動自顧荒廚乏吾宗忽見招相對意歡
洽謂適市上來買得能言鴨不爲要術煎聊學君
舉法堆爐鵠炭青鼓之以輕箠金鉤懸其頸鐵烙
貫其胛用猛兼用文火勢取迫脅膚脆齒易消肉

嫩爪可掐美比庾悅驚香勝義興鮑大截佐以手
肥臠利在挾流膏味逾甘帶血口如歆飽餘尙流
涎饒甚心已怯想當飲啄時菰蒲爭唼喋忽然刀
匕供口腹恣一霎君聞大軒渠謂此意殊狹我非
殺無故彼自應歷劫安知鼎俎閒不似江湖狎趁
茲新釀新浮白且一呷

甲子除夕

鶴怨鸞孤已一年又逢除夕倍潸然去年此夜鈴
鐺影猶對荒廚理歲筵

總帷風動影幢幢萬種愁魔未許降絳蠟不燒門

似水伴人心事有殘釭

椒花柏葉奈愁何且共鰥魚守歲過枉是年年祝
如願不如我願事偏多

題家雲齋

孟塗

蒼茫獨立圖

舉頭豈便無天外放眼直可凌三界若教幽獨耽
苦吟萬里胸懷總嫌隘吾宗才子弱冠逾羈勒不
受千里駒曠觀動與古時會傲氣未屑今人居學
詩不學步陳跡倒躡虛無影三尺論詩不論睂睫
閒望見海上三神山君才騰蹕有如此安肯局促
戶牖死寫出吟詩獨立心一片蒼茫景如水君何

不學崔顥題詩黃鶴樓江天去挾飛仙遊又何不
學王勃一序擅奇作江風直送滕王閣不爾便如
吾家簑笠翁浮家汎宅煙波中更有乘槎博望客
尋源忽與銀潢通胡爲作此踽踽涼涼蹤澤畔仿
佛三閭同朗吟每覺震山谷冥想徑欲搜洪濛君
不見擊鉢分牋堪共鬪閉門覓句亦易就莫似山
頭一杜陵到處人逢嘲太瘦

山水知音圖爲單二竹軒題

卷中之人如可呼示我巨杵之橫圖琳瑯佳句紛
滿口口欲頌君心則否或云不動操寄意在山水

或云手善揮流水高山伯牙子二者之說皆有之
我謂其意不在茲先生有心濟一世先生有才排
萬事生來自是廊廟人肯向空山閒位置抵掌蘇
秦華屋談驚心毛遂囊錐利讀書讀律得兩兼利
物利人非一致仲宣作賦有憂懷杜老依嚴非本
志縱然羔雁走天涯誰識魚龍在平地知音僅屬
山水閒可見人無真賞至圖中深意我能窺莫教
長稽圖名義卽今朝衣支手版大府相逢盡青眼
中郎入耳早知心嵇康對酒何容嬾我似鞠通識
琴理以琴喻君君自喜要非招隱左太沖亦非檄

絃不設之陶公此身原是龍門種莫認焦餘爨下
桐

梅雨新霽許浣心

淙

汎舟虹橋過城西見

訪不值辱詩六章次韻奉酬

曉起芻尼報乍晴沿緣也復踏莎行偏教悞却中
郎屣拾得明珠眼倍明

保障湖寬浪拍隄畫船來往幾曾迷定知鶴唳城
邊路小舫終嫌略約低

聞說尋芳事未闌玉壺樹出酒波寬故人種得蕭
郎竹珍重來看十五竿

鴛鴦湖水劇清華君住煙波第幾家曾向語兒亭
下過賺儂雙槳只輕划

佳句纏綿見性情馬卿才調可憐生生來官燭原
無分悞認春寒宋子京

荀郎今作病維摩鶴怨鸞孤往事訛慙媿才人遠
相訪杏花宮體已銷磨

題襟館卽席賦硯鏡

世煎錫製屏立硯側收取其光以入硯
昔人所無亦未有吟詠及之者惟東坡
集中有月石硯屏詳詩意亦祇硯旁陳

列之具未嘗以其光爲用與今製鼎也
方君子雲贈曾賓谷都轉古鏡一枚背
作鼎形仿佛如屏都轉將以爲照硯之
具以視范錫爲之者雅俗判然矣爰命
同人賦之予亦繼作

使君手持一泓水當筵贈自方干子傳看不矩亦
不規鑄作鼎形垂兩趾橫約二寸縱倍之厚僅數
分完無疵質輕不重光不蝕古翠尙賸苔痕滋此
鏡不韜雲錦帙亦不飾之流蘇結不照嫋嫋之玉
顏復不照星星頭上髮只從硯匣伴琉璃一片晶

榮鸛鵒活我聞公家硯往往多端州蘭亭之硯

早秋蟬腹之硯碧血留蓮葉之硯曾共隨園遊

硯諸

皆見都轉集中

使君一一快羅列揮灑翰墨生吟謳有卓

此鏡勢逾峭至理喻之乃知妙如微波搖空如明月影倒如白雪炫夜如夕陽返照光不在遠他有耀曉閣寧愁一隙微宵燈不怕雙眸眊使君晏坐題襟館清泉手注蟾蜍滿若教移置硯山有惜少良工署新款

都轉有硯山二亦見集中

志館書懷四首簡王惕甫

世孫

國博

拋却堂堂歲月過低頭且復就編摩菲才漫擬雙

條燭能事難憑一目羅缺陷補來終有憾殘叢拾
處敢嫌多蛛絲蟬粉都陳跡奈此紛然故紙何
馬筴牢盆事久湮一編平準竟何人宏羊經國徒
心計劉晏多才豈利臣那有旋風煩筆吏居然數
典似家珍只慙無地酬知己書局虛隨落拓身
無端謠詠向蛾眉費盡丹鉛總未知畫到葫蘆應
笑拙埽完落葉已嫌遲涼宵燈影雙眸纈孤館秋
風滿鬢絲莫道因人常碌碌喜君臭味不差池
簡看牘尾敢爭長塵土空堆冰雪腸祇許虛懷成
學業難邀公論到文章館餐早媿緇衣賦名姓誰

分玉座光

書成進而予與君例不得預

御列銜

莫便忽忽遮眼

過要從心苦識工良

乙丑十月朔日送亡室靈輜歸里

生不同歸死獨歸傷心往事淚頻揮
魂依孤櫬家何在路近鄉程願已違
瑟瑟江波搖素纜離離霜色點麻衣
殯宮來歲棠梨發空見寒灰化蝶飛

劉忠節詩

代

公名欽隣字江屏其先江西新昌人曾祖讓明宏治中任兩淮鹽運副使子孫遂以鹽筴占籍儀徵公登順治十八年

進士第知富川縣康熙十三年廣西孫
延齡反圍富川公嬰城固守會有內應
遂陷公巷戰被執授以僞官擲印大罵
北向拜 闕東向拜母賦絕命詩遂自
經事聞 贈太僕少卿諡忠節墓在邑

之青山

白沙江上青山青墓門傳有劉江屏先生舊是名
臣後占籍眞州長世守早時科第入金門遠道專
城綰銀綬當年定鼎逾三十已見櫟槍天外戢無
端小醜忽陸梁黑氛壓陣妖雲集先生固守無二

心命與危城共呼吸兵勢雖單兵氣堅忠魂未訴
天先泣賊來圍之數十重以志作城不可攻守陣
不哭咸奮怒暮氣雖擊猶從容偏陽懸布屢爲斷
臯比蒙馬何由衝摩訶擲銳應手仆李陵蹈刃張
拳空一馬僅供三日食一稍輒貫十數賊兵符請
救神鬼愁毒箭飛空風雨亟先生見之無懼色我
身無力心有力岌岌孤城總不摧搖搖苦志誰能
識久知孚信及豚魚豈料陰謀生鬼蜮魚爛亡來
事已非破巢卵在完難得短兵巷戰無外援軍中
未喪先軫元爲賊所執賊不害授以一官轉讎讎

手擲僞印乃大呼此物焉敢來浼吾讀書有志豈
可誣不願爾生願爾屠千秋自有青史論一命竟
挂朱繩殂大府列狀上其事 朝廷褒忠下其議
易名之典紀其實崇爵之加厚其賜當今

聖主重大節更命所司錄後嗣事隔於茲歷四朝
恩騎頭銜賞延世吁嗟乎詞成絕命忠孝全流傳
萬口在富川君不見臨淮鐵叢宏血不及微臣猶
有舌 公詩云微臣猶有舌不肯讓睢陽

送女襄歸無錫

汝生廿九載汝嫁十三年朝夕侍我側鍾愛意萬

千憐汝賦于歸重以舊姻聯恐汝遠父母壻鄉共
延緣壻家本望族甲第相後先奈經中落後門戶
亦可憐兄弟不無故舅姑早棄捐壻方抱孤露孰
與爲周旋因作卵翼計不使告顛連亦復化積習
幸稱子弟賢汝身有可恃吾意無所牽庶幾出入
時彼此得兩全譬如生一男授室理亦然縱無裝
可分或有硯可傳前年汝母歿壻意忽以遷時時
作調語先返故鄉天故鄉雖可懷曾不念粥餽今
春寄書來移家計已堅諭之不肯從其說轉護前
遠我邗上家汎彼梁溪船壻意誠詡詡吾恨方縣

例本直官言集
縣憶我慣作客歲歲開離筵汝時雖幼小每自泣
涕漣旣長猶復爾別緒豈易宣此去殊浪盍此心
終迴延汝有從人義不忍責之專我貧無長物嫁
具原淺淺至今箱簾中行李僅數肩塔家雖云寒
尙餘數稜田我并不及此浮家無一椽以是較得
失汝歸良自便揮手聽汝去淚出比涌泉只算纔
嫁汝三夜燭更燹深宵憶江南歸夢如朱絃

懷葛二林以府用前和隨寓菴卽事原韻

二首

繞樹烏飛未定巢記曾惜別賦勞勞王恭凝望三

春柳枚叔虛聽八月濤憐我風花身是夢羨君湖
海氣猶豪不知詩卷今多少奴僕分明久命騷
難從食宿託西東蹤跡頻煩問遠風枕畔黃梁猶
待熟鏡中白髮未全公敬亭拄笏山光綠書局聯
吟燭影紅時就寧國志局之聘莫便相逢輕出處卽今杼柚
已常空

董香光山水長卷爲戴亭山題

思翁書法追二王思翁畫法凌倪黃書法畫法兩
神妙能以一家兼衆長戴君示我卷九尺云是思
翁畫真蹟淋漓元氣十指來一片煙雲爲闔闔山

光醖醕欲破空翻墨忽作浮嵐濃疏林遠樹不可
到萬里直接天濛濛山重水複通橫約似說山前
有墟落柴門開處綠成圍一半春陰在樓閣春陰
散入平林去隱隱孤城渺何處扁舟葉葉盪槳來
流水聲中幾家住幾家茅屋相沿綠浦澈一出成
奔川陡覺極目心茫然雲霞塞空態萬變遠勢但
覺拖長煙鄂渚前年曾鼓柁大別江天常澹沲曉
向晴川閣畔行暮從黃鶴樓頭坐沙汀蘭汀數往
還輕衫時被涼雲裹此卷分明粉本看邱壑胸中
位置妥吁嗟乎從來翰墨皆通神惟有善畫難亂

眞君不見學董之書尚可勉學董之畫能者鮮

題德清閨秀朱雨華折枝桃花扇面

輕絁曾寫海棠紅又見天桃活色工閒却一歛螺
子黛畫眉牕下管春風

韶光都付寫生家怕向風前見落花畫出折枝應
有意更無流水到天涯

勻染燕支用意深繡牀寫罷幾沈吟一枝沒骨徐
熙筆也似鴛鴦譜上鍼

李嗇生同年出其嘉慶元年以後詩屬予

刪訂並以五言三十韻先之依韻奉呈

廿載同爲客相看每惘然不成王粲賦空傷伯牙
絃書牘三千管吟輸九萬牋蓬山春自遠桂苑藥
常聯阮籍難爲眼洪厓易拍肩寧教授蚓見甘作
拔茅捐名紙書生謁頭銜太祝遷顛當牢舊穴脈
望守陳編座覺流塵滿園稀束帛萎我應隨地拙
君自及身傳司馬先分簡揚雄慣握鉛悠悠長送
日矻矻每窮年兆得三鱣降窺將一豹全鄭籃思
共昇徐榻幾曾懸自有眸雙炯誰啜膝並孿芷蘭
同臭味香火結因緣交合隨龍化文防悞覬螻昨
朝過陋巷相對坐寒釭金石當前擲風花著意牽

片言驚警策一字媿名賢規矩前修合丹黃大筆

先

前此詩藁爲趙雲松觀察點定

唾壺酣後擊石鼎睡餘煎買勇

超三百稱名類半千騷壇欣有主裨將分居偏對

李真堪御逢盧詎敢前奇文看幟樹餘伎亦波沿

君精于古文詩其餘事耳

宅喜東西接牀應上下憐底須憂契

隔久願得周旋歸思濃於酒襟期澹似禪不勞嘲

飯顆元髮早成宣

齋生復惠詩二章依韻再酬

千古論交是此心敢從流水說知音蟬蛄豈便蒙
仙藥磁石居然引曲鉞自有入懷無價璧斷非在

治不祥金只憐比較胸中思絕脈終憂力不任衡
少文之人與董仲舒等涵其胸中之思必將不任有絕脈之憂

曾把金鈴比字圓才華誰許共翩翩及身早定名
山業投篋應將苦海憐流浪琴書無故土因緣文
字有同年而今且過牆頭酒世慮從教一例捐

喜晤許勉齋明府時督運京銅兼擢威遠
司馬自滇南入 覲道出揚州賦此贈行

別去十八年相隔一萬里人世參商竟如此百歲
離蹤能有幾忽然天上旌旗來令我聞聲動色喜
一喜君聲名賢再喜君官職遷更喜君無世俗態

日月雖改情逾堅小牕啁啾一晌語頓覺聚首如
當年如斯之人乃可逐雲龍而上下乘車戴笠何
有焉看君容貌仍魁梧去聞君清貧尙如故自言
絕徼寄生涯一半頭銜已嫌悞朝廷鼓鑄仰溟
黔托命鯨波持檄赴其閒歷盡萬難辛鬼訝神愁
不知數虎鬚之峽蠶背梁白馬之灘龍洞鋪簸箕
石鼓與磨盤直下瞿唐更灩澦聞諸詭異頸已縮
豈知盡是來時路出入蛟龍窟宅中惟有篙師與
爭怒萬一不戒喪厥貲例責所償惟爾措聞君此
言誠大難賀君此行已卽安京華不逾四千里但

有順軌無狂瀾門開閭闔

天顏近佐郡風流

見來軫卽今不次待賢勞

天子鎮頤定俞允吁嗟乎人生局促戶牖中安得
開拓萬古之心胸君今莫厭輶駒伏尙有鮎魚難
上竹

浮香樓圖爲表姪高惺泉題

昔題杭氏小松吹

杭堇浦先生族孫茂野曾畫小松吹書堂圖屬予題句

今

見高子浮香樓浮香松吹雨無有祇憑圖畫相尋
求前人堂構後人惜此意絕勝營菟裘君家先世
讀書處數椽老屋西溪頭屋不可見圖可識展卷

景物清而幽一重白雲一重水沿路穿破沙棠舟
過橋側尋樵徑入門前萬疊煙光稠古牆斜帶薜
荔石老木下瞰蘆花洲青山屋後作屏障嵐氣壓
雲凝不流平分一半與修竹萬綠直上寒光収其
餘盡作梅世界一十八里香同浮孤山縱有三百
樹林逋仙去無人遊未若此溪擅梅勝香靄撲水
春悠悠君家樓子在梅隙高下但見南枝抽寒晨
不惜風幔捲巡簷索共良朋儔有叔不癡爲補繪
圖爲邁菴清境欲往今無由當時園花查上舍卜
表弟作隣有約徒虛謀君之大父我姑壻詩筆直欲凌青

邱二篇追和有深感浩劫一去誠難留我今讀詩
轉振觸典型空在思前修況復久拋溪上路浮家
汎宅如輕漚偶來親串作邛岷添我萬斛羈栖愁
又將出山爲貪仕楚冠強戴疑沐猴故鄉直恐在
天上漂泊無地輸閒鷗誓擬茲圖買山隱一洗卅
載梅花羞君應盧胡顧梅語斯言久熟然乎不

荷花塘紀事

西水來五埧開荷花塘決聲如雷塘中良田千萬
頃一片波濤浩無影塘中居民千萬家不見民居
見漁艇一半漂流一半竄生者一半死一半大隄

之上人如麻幾尺乾土依爲家東風吹來雨點急
如龍之頭雨中立面目淋漓衣履濕三日腹中無
一粒萬人仰首盡呼號哀響徹天真宰泣大吏奔
救來趨踣議撫議賑常皇皇離使雖無守土責亦
復民瘼關心忙謂額約齋離使萬斤餅輓官廚麪遣使沿
流飼之徧噴聲似與水爭流菜色相看立時變去
年淮南水沒田今年淮南水拍天淮南之災歲接
連空費百萬官家錢君不見王營減堤宿南口處
處橫流破隄走以隣爲壑無地無荷花之塘亦何
有

香修詞十首爲嚴修能

元照作

香修張姓祁門人外舅嵇文恭公家婢也修能爲文恭曾孫壻癸丑客浮梁視妻弟於湖口觀香修時方十齡後謀諸中閨而納焉已十九矣香修小字秋月無錫華明府秋槎繪秋江載月圖以貽修能修能復取十六觀經戒香薰修語改字曰香修並爲琢小印凡牋札往來與修能印雜錯用之香修幼慧能誦唐宋人小詩而於青蓮但見淚痕濕不知

心恨誰句尤所心喜修能嬖之甚爲別
館於餘不溪而挾之與居彙同人所贈
詩詞曰簪花小集屢索予詩而未有應
今年復介梁山舟表兄來責前諾爰賦
十絕句附諸君子之後

重門邂逅可憐生誰把涼蟾作小名記取石鍾山
下路江波千尺似郎情

碧玉生來自小家踏青時節好年華分明一片藤
蕪地長養春風豆蔻花

十載形相意早輸娉婷豈惜緩量珠城南年少頗

狂甚但見羅紵便將鬚

畫圖往事託氤氲一舸濃香勝閣芸載得秋來人
共瘦青荷如鏡水如裙

戒香煙篆拂陀羅小印紅泥手自搓一室但教天
女伴不妨長作病維摩

短韻唐詩暗討論檀郎指點意溫存王昌嫁得心
無恨底用幽牕詠淚痕

大諫同名舊事徵香修篆後又修能直教字亦成
連理却喜旁人任意稱

何須越網結千絲正是桃根打槳時我亦墮鄉來

往熟無人解道謝芳姿
小婦逢歡大婦愁一生心事說綢繆通辭儘許微
波託莫忘紅閨舊蹇修
餘不溪水綠于苔家具攜將一櫂來不用更歌江
有汜秦簫先占鳳凰臺

流民歎

淮黃歲歲漲動以隣爲壑山清高寶水中央十戶
九家歎漂泊去年水來田始耕今年水來田未成
終年種田無一粒萬目懸懸水上泣西家無田散
四方東家有田亦水荒有田無田皆逃亡夫擔簦

婦攜筐零丁乞來他鄉他鄉不比故鄉苦縱到
他鄉誰是主去年施粥在揚州但道揚州爲樂土
朝亦不得栖暮亦不得栖黃昏空巷歧路迷露氣
入骨風淒淒富家大屋連雲齊更深寂寂牢雙扉
暫從簷下相爲依無端猛雨深濺泥男方呻吟女
又啼俵俵滿街面如墨官來議賑心孔亟 朝廷
日費百萬錢供爾流民纔一食君不見安瀾之慶
誠爲多若要治民先治河不爾其奈哀鴻何橫流
誰使年年甚此咎須知水不任嗚呼水不任咎竟
誰任

重宿西湖陵茗精舍

湖上招隄古重憑舊日闌
佛憐吾輩老僧當故人
看入座松濤亂侵階沼氣寒
青邱無恙在來與共
盤桓

謂高邁菴

刻先大夫露香書屋詩集成焚一編於墓
下而爲詩以告

四十年來守一編而今差喜得流傳焉
烏亥豕慙精校柳雪皇華感獨賢
事業無成薪未荷文章有壽石同堅
焚來冀慰重泉意莫遣寒灰亂紙錢

展亡婦殯室有感二首

一棺蕭瑟住湖濱三載幽懷感宿因汝未歸泉吾
作客算來生死總浮身

會同歸櫂返西湖湖上風光似畫圖

乾隆辛亥春
會同住湖上

者兩

今日殯宮人寂寞冷煙殘照白楊孤

鳳麓讀書圖爲梁弓子題

我外王父子高祖鳳巢老屋江之漣四圍花竹秀
而深我母兒時釣遊所我母爲我言翰林相國兩
舅氏當其未第時讀書曾在此競傳茲地爲發祥
感義至今滿鄉里當時亦有圖畫存誰其繪者倪
黃門不知何年忽流落乃在梁溪相公之書閣相

公吾外舅壻鄉常往來見此心忤然潛取入我懷
懷歸獻之君家督璧完于趙無嫌猜題詩作記藏
什襲每憶前事思重開外祖谿父先生有屋在江干曰鳳巢書屋倪黃門棧疇爲之圖久失去後予於無錫外舅嵇文恭公家故麓中得之因取以歸于山舟表兄事在乾隆乙巳
君今有意述祖德長想故園終未識也教寫出
讀書堂江上嵐光拋不得嵐光盡入奚生手欲費
渝糜應一斗紙上煙波萬頃多疑有涼雲吐其口
收將濃翠卷中來一一皆爲君所有捲幔朝看松
色飛朗吟夜落濤聲走一椽昔日臨江臯後來甲
第連雲高君猶懷舊欲兼取意雖不廉興自豪餽

生卅載長爲客無復從人典半宅先人舊宇久漂
零歸來空臥湖山碧君家生來巢鳳皇老鳳倦飛
雛鳳翔鳳毛自是君身有早聞叶律鳴歸昌君如
真能返鳳麓先借阿儂十日讀瑯嬛小犬休吠人
我亦生非凡鳥族

住湖上兩旬又將去此偶誦樂天到處回
頭盡堪戀就中難別是湖邊之句不勝黯
然

此生已分作浮生拋却明湖太不情山色向人長
旖旎柳絲雖老總輕盈水禽冉冉來相傍岸蓼離

離欲送行幾度回頭吟白傅鄉心依舊未分明

臨平道中

兩岸雲陰壓不開新添秋水綠于苔
臯亭東去臨平近一帶青山櫓後來

舟過毘陵喜晤趙雲松觀察卽次八十自
壽八首原韻奉呈

東風吹送隔江塵早識先生杖底春
沐並已疑前代客敏中原是耐官人
文章聲重誰同價簾溷花飛定夙因
一落空山三十載天教養就不凋身
漫說躬耕二頃田此生原住大羅天
卽教一面人

爭識不待千秋業早傳隴北更無局岫意江南先
占買山錢分明閱歷成桑海結習難忘侍從年
真箇山中歲月長從來三徑不曾荒早時也作賃
春計此後都居衣錦鄉畫戟香清凝燕寢芙蓉江
遠汎歸航卽今湖海餘豪氣樓仰元龍百尺梁
從軍匹馬馭奔虹誰信經生似子弓只道風雲成
上將豈知翰墨有奇功劒騰虎氣當杯熱牋擘羊
皮琢句工洵是江山能有助翻教回首百蠻中
如此雄才見亦稀何須勳與古人期貌貅隊肅千
門靜閭闔風高萬羽馳我法我行無倚傍吾廬吾

愛且栖遲彌香長合低頭拜不在稱觴介壽時

枚叔每虞銜橛馬苗君或作倒繡孩常將跌宕平

生志來作牢籠一世才說士至今猶挂口種花何

處不深培鰕生也復叨知己曾醉當年北海杯

來往扁舟興未闌當時常許見驂鸞得遊原覺龍

門近欲附方知驥尾難月榭風軒千鄴架笠簪簞

袂一漁竿不才溫卷今如杵安得無花老眼看

不是涪翁也號皤

蜀中稱尊老者爲波朱景文辨之以爲當作皤黃山谷在涪州

自號涪皤見愛日齋叢鈔

堂堂歲月幾經過英雄自昔無餘子

塗抹惟應屬阿婆致仕邱爲身尙健買花子野齒

非多我來正作添籌客重挹汪洋萬頃波

袁節母韓孺人竹柏樓居圖爲袁綬階題

孝子袁綬階示我軸如杵指點圖中樓云是母氏
當年苦節所登樓久與人事謝但有冰霜少蘭麝
冰霜歷盡人未知一十五年樓不下樓中何所有
刀尺燈熒熒樓外何所有颯然竹柏陰風生陰風
撼樓夜半急冷氣削膚雙眼澀課兒讀書望成立
阿母寒機手自緝一身與兒共呼吸長歎向天天
爲泣旁有室鬼淩虛來不敢笑人轉於邑烏頭綽
楔看森森不見母身慰母心母心雖慰兒不樂每

過樓前淚珠落竹常知節柏常堅不比母生懷抱
惡昔日兒孤與母俱此日兒孤惟一軀孤兒不孤
今始孤樓雖長存母則無君不見兒能讀書母心
喜兒能表揚母不死嗚呼袁君真孝子

乞閨秀朱雨華畫扇

緘得流求小扇輕煩將妙筆寫天生海棠紅豔梨
花白一樣春光兩樣明

題吳更生

引年

斷苓圖

我聞黃初起茯苓久服竟得仙日中見形不見影
凌空沖舉五百年又聞任子季茯苓日爲餌爲感

玉女下天來真箇神仙長不死君身仙骨誰與同
也復采藥深山中長鑱帶雨瑤草膩短笠破曉蒼
巖空君不見山中宰相陶宏景嶺上白雲常共冷
勅給茯苓如給餐服食時從大官領天台女兒顏
如花鼎煙捲起生朝霞胡麻爛煮待君飯路入碧
桃洞口家披圖我亦生遐想便擬從君荷鋤往不
須千載覓松根石髓探懷願分餉